

Eso Osuse mi abo mgbi iMaki

IJon okyo iBatisima me ofe

¹ Owita-wita mgbi Eso Osuse mi ikpewo iYesu iKrestu, Ongwe Imgbasho.

² A tsekise lo mi afe mgbi oyegbo Adzaya gbee:
<<N ka do ongyeso mgbi ani no teyi abu,
ka me abu ofe>>

³ <<Ela inggise le kwu mi okwese gbee,
<Me Otse ofe,
man ofe no byi klididi.> >>

⁴ Ta iJon okyo iBatisima ba, le kyo iBatisima mi okwese dile gbeeso mgbi iBatisima okyatitukwu nu ma dzata inggise yi ali ibwubwe.

⁵ Ese iJudia duu beyi inggise emi iJerosalin to ke mbon. Le fwi ali ibwubwe mgbi ama, iJon dile kyo ma iBatisima mi ekyoo mgbi iJodan.

⁶ IJon wo angwuto ngwi a me mi andu ilakwumyi, yi okpa mmbwaba mi oshi mgban, ma o li gye okpa yi enewo.

⁷ Nene li eso mgban nose aani: <<Inggise oka kye ani iyikpa, O fyumfye ngha ani, odi okpafu mgban kpaa ani me oshu ba.

⁸ Ani le kyo ema iBatisima yi eni, nghaduu ongwu ka kyo ema iBatisima yi Onodzi Osaan.>>

Ibatisima yi igyila mgbi iYesu

⁹ Egbe oka ne iYesu kyato mi igeli iNadzareti mi ayese iGalalia wa to ta, iJon si kyon iBatisima mi ekyoo iJodan.

¹⁰ Dafi iYesu le kyato mi eni nɛ, o di esho kwulu man Onodzi kye esho ba mbon dafi anyama mani.

¹¹ Ta ela kye esho gbɛɛ: <<Abu li Ongwɛ Ani mgbi itukwu-itukwu; i kpa ani yi abu saan.>>

¹² Onodzi byakpa kyon dɛsɔ lu okwɛsɛ akponyi,

¹³ o dɛ okwɛsɛ egbe ngwusefa, ngwi iSatan le gyilan. O dɛ yi emi mmbwaboshɛ, engyɛsɔ dile tobyun.

IYesu kwu engwafɔ emi ababo ela

¹⁴ Ngwi a wa kye iJɔn woke obawi nɛ, iYesu kaka ifu iGalalia, le gbɔ Esɔ Osuse mgbi Imgbasho.

¹⁵ O gbɛɛ, <<Onɔ ma gyo wa. Esuto mgbi Imgbasho dɛ kwɛkwɛ. Kyatitukwu mi ali ibwubwe mgbi ema di noyɛyɛ mi Esɔ Osuse nɛ na!>>

¹⁶ Dafi IYesu nose le kyikye mi ewuuto mgbi iGalalia nɛ, o di iSaimɔn yi Andru ongwunɔn le ngwi uke mi uto, ikyena a li ama otuntɛ.

¹⁷ O nya ma gbɛɛ, <<Kyɛdɔ ani na, ta n ka nu ema yɛɛ ama okwu inggise, ka li mmbweni wuba.>>

¹⁸ Ntunto neta a dzata uke mgbi ama kyɛdɔn.

¹⁹ Ngwi o gblekɛ iyayi gwee nɛ, o di iJensi ongwɛ iDzebedi bɛyi ongwunɔn iJɔn mi uwaa, tole mɛ uke mgbi ama.

²⁰ O mbe onɔ ba ta kwu ma ela, ta a dzata otsɔma mi uwaa yi ama ngwu a kye ma idɔ untɛ si kyɛdɔ iYesu.

IYesu lɔ onodzi obube onya

²¹ A lu iKapenahun, man ngwi egbe otonyidɔ wa ba nɛ, iYesu kaka ifoozu okwakye mgbi emi iJuda si wita otsungwɔ.

²² I kwulu inggise ntona ewo mi ungwɔ otsootso mgban, ikyekye o tso ma dafi inggise ongwu ndze yi mfyɛ mani, dze dafi mgbi etsetse mgbi ola ntona ba.

²³ Mi onɔ ma ta, inggise oka mi ozu okwakye mgbi emi iJuda ngwu ese dɔn ikye teela gbɛɛ,

²⁴ <<Li alungwɔ ngwi abu mina yi eyi, iYesu ongwɔ iNadzareti? Abu ba owa dzili eyii? Ani ye inggise ngwu abu dze mani, Ongwe Osaan mgbi Imgbasho!>>

²⁵ IYesu kyɔkyɔ yan gbɛɛ, <<Yile ondu tukwu! Tase mbon!>>

²⁶ Onodzi obube na siin mfyumfye yi ela otaata man si tɔ dzanta.

²⁷ I kwulu inggise ntona ewo kpakpa ta a byi ewoma gbɛɛ, <<Li ekye dɛn? Otsootso ofufe nkye yi mfyɛ! O li wo onodzi ibwubwe kpaa ola ta a li fwon.>>

²⁸ Odze mgban si gbɔfwɛ vla kpatse ayese iGalalia duu.

IYesu ngyɛlu inggise gwuba ootse

²⁹ Ngwi a dzata ozu okwakye mgbi emi iJuda mata, a lu yi iJensi beyi iJɔn mi ude mgbi iSaimɔn yi Andru.

³⁰ Awo bwa Onowa iSaimɔn ladze ese, man a nya iYesu odze mgban.

³¹ Nghane o ke mbon, yan abɔ kyilen sɔkunto. Awo na dzanta man o si wita ogbe ungwogyɛ nu ma.

³² Mi onɔde na ngwi onɔ kaka ese neta, inggise ntona gbe emi ootse beyi ama ese dɔ ma ikye ba mbi iYesu.

³³ Emi igeli na duu kwakye mi onufe,

³⁴ man iYesu ngyelu inggise gwuba ootse idzidza-dzidza. O di lo onodzi emese gwuba onya, kpaa o gbela ni onodzi emese gbodze ba ikyekye a ye ito inggise ngwu o dze mani.

IYesu gbeeso mi iGalalia

³⁵ Mi egbegbe ototu ngwi imbe ka yifu ne, iYesu kyato dzata ude lu imbe ngwi o ka dze yuon, bibo mi ele.

³⁶ Ne iSaimon yi angbeka ntona lu le pitan,

³⁷ ngwi a tun ne, a nyan gbɛɛ, <<Ali inggise duu le pita abu!>>

³⁸ Ne iYesu nya ma gbɛɛ, <<I ke agwo angbeka ama nto kwɛkwɛ neni, zukwu nin ka gbeeso mi ele kpaa, lubana li ikye ungwɔ ngwi ani ba ma aali.>>

³⁹ Nghane o dzagaba kpatse iGalalia, le gbeeso mi ozu okwakye mgbi emi ijuda dile lo emi onodzi emese to.

IYesu ngyelu inggise otsoma

⁴⁰ Inggise ndotsoma ba mbi iYesu wa kwakwafo ese tekye nun gbɛɛ, <<Ni abu mina yo, o ki nu ani yee saan.>>

⁴¹ Ngwi iYesu li di elela kpakpa neman o na abo mgban gbo inggise na ewo di nyan gbɛɛ, <<Ani mina; yee saan!>>

⁴² Ple neta otsoma dzanta man ootse mgban ngye.

⁴³ IYesu si byakpa nun ofe no lu di kwon ado saan gbɛɛ:

⁴⁴ <<Di gbɛɛ abu nya inggise onyi odze ne ba. Kpaa lu ka kye ewabu tso inggise ofife mgbi

Imgbasho di fifɛ dafi iMose nose woola ikye oyɛɛ saan mani, no li obwendɛ mboma.>>

⁴⁵ Nghaduu o lu le ka gbɔdzɛ ele dzii, dile gbɔfwɛ utsa nani. Ikyenghanɛ, iYesu yagba kaka igeli na mi ododa wuba kpaa lu ka dzɛkɛ imbe oklii. Jokpaa inggisɛ ntona dile ba mbon mi ali agya duu.

2

iYesu kyile inggisɛ ngbikye tukwu esɛ

¹ Ngwi egbe wa sisi gwee nɛ, iYesu si yidɔ lu iKapenahun, inggisɛ ntona si fwo gbɛɛ o yɛ kaka udɛ.

² Ta inggisɛ kwuba kwakye mbonyi, nghanɛ imbe dzema wuba, onufɛ mi esɛ kpaa imbe dzɛ ba. iYesu sile gbeeso nya ma.

³ Ta inggisɛ angbeka nghi enɛ wa to, kye inggisɛ ngbikye tukwu esɛ le ba mbi iYesu.

⁴ Dafi a yagba kyon kaka mbi iYesu ba ikye ibyi inggisɛ nɛ, a ka flɛ ikpendu mi ikye mgbi iYesu yɛyɛ man kyon tashulu yi amukwu wa lakiyayi iYesu.

⁵ Ngwi iYesu di oyɛyɛ onuunu mgbi ama nɛ, o nya inggisɛ ngbikye tukwu esɛ na gbɛɛ, <<Ongwɛ, a dzita abu yi ali ibwubwe mgbi abu.>>

⁶ Etsetse mgbi ola mgbi iMose angbeka sɔto mmanani, a le tsewɛ mi itukwu mgbi ama gbɛɛ,

⁷ <<Kysinɛsɛ inggisɛ nɛ gbɔdzɛ ngha? O le kwu Imgbasho shanyɛ! Li emɛ ka dzɛ inggisɛ ta yi obube se Imgbasho yuon ta baa?>>

⁸ Plɛ neta, iYesu ka ye mi onodzi mgban gbɛɛ li ungwo ngwi a le tsewɛ mi itukwu mgbi ama joaali,

man o nya ma gbɛɛ, <<I kyɔsine ngwi ema le tsɛwɛ ito ungwɔ ntonɛ?

⁹ Li ole nghao sunɔ ba: onya inggise ngbikye tukwu esɛ na gbɛɛ, <A dɛɛ abu ta yi ali ibwubwe,> naadi o gbɛɛ, <Kyato, kyelu obutu mgbi abu kyikyɛ>?

¹⁰ Nghaduu li onu ema ye gbɛɛ Ongwɛ Inggise dɛɛ yi mfye mi esɛ nɛ odɛɛ inggise ta yi ali ibwubwe...>> O nya inggise ogbikye tukwu esɛ na gbɛɛ,

¹¹ <<N nya abu, kyato, kyelu obutu mgbi abu lu udɛ.>>

¹² O kyato, kyelu obutu mgban si kyikyɛ mi inai ma duu. Ungwɔnɛ kwulu ali inggise duu ewo man a si tsɛ Imgbasho, le gbɛɛ, <<Eyi yama di ito ungwɔnɛ ye ba!>>

IYesu kwu iLevi ela

¹³ Nɛ iYesu di yido kɛ ondu uto mgbi iGalalia. Ibyi inggise ba mbon, ta o si wita otso ma.

¹⁴ Dafi o kyikyɛ le kɛ nɛ, o di inggise ogbɛ udza ifyɛɛ, iLevi ongwɛ Alfeɔ sɔdzɛ opo ogbɛ udza ifyɛɛ. Man iYesu nyan gbɛɛ, <<Kyɛɔ ani,>> ta iLevi kyato kyɛɔn.

¹⁵ Dafi iYesu le gye ungwogye ongwɛ onɔdɛ mi udɛ iLevi nɛ, ama ogbɛ udza ifyɛɛ kwuba yi <<emi ali ibwubwe angbeka>> tole gye ungwogye biyan bɛyi engwafɔn, lubana inggise kwuba kyɛɔn.

¹⁶ Ngwi etsetse mgbi ola mgbi iMose ama nli emi iFarasi din le gye ungwogye yi <<emi ali ibwubwe>> yi ama ogbɛ udza ifyɛɛ nɛ, a byi engwafɔn gbɛɛ: <<Kyɔsine ngwi ongyukwo mgbi

ema le gye ungwogye yi ama ogbɛ udza ifyɛ yi <emi ali ibwubwe>? >>

¹⁷ Ngwi iYesu fwo ungwɔnɛ nɛ, o nya ma gbɛɛ, <<Li ama nle saan ma li mina inggise obwe ootse ba, kpaa li emi ootse. Ani ba owa kwu ama nle saan ela ba, kpaa li emi ali ibwubwe.>>

*A byi iYesu ita mi odɛ ondu
otukwu-tukwu*

¹⁸ Onɔ oka nɛ ama okyɛ yi iɔn okyɔ iBatisima bɛyi emi iFarasi tole tukwɔndu. Inggise angbeka si ba wa byi iYesu gbɛɛ, <<Kycsinɛ ngwi engwafɔ mgbi iɔn okyɔ iBatisima bɛyi engwafɔ mgbi emi iFarasi tole tukwɔndu, kpaa engwafɔ mgbi abu le tukwɔndu ba?>>

¹⁹ iYesu nya ma gbɛɛ, <<Ingyoga emi oga mgbi eba ka tukwɔndu onɔ ngwi obongyaa dɛ yi ama maa? Ungwɔ ka dɛ ngha ba du. Ngwi a ka dɛ yi obongyaa tayɔ, a ka yama tukwɔndu ba.

²⁰ Nghaduu onɔ kyɛma ngwi a ka kyi kyelu obongyaa mi idzidɛ ma ta a ka tukwɔndu.

²¹ <<Inggise onyi li kye ayɛ angwuto ofufɛ kye tukwu ogbugbe ba. Ki non kyɔ ngha, ayɛ ofufɛ na ka kyi kwolu di fawa angwuto ogbugbe nani, dika nu ifo na yɛɛ vɔn.

²² Inggise onyi dika kye eneekwɔ ofufɛ yaokɛ ikpɔkpɔ eneekwɔ ogbugbe ba, ikyekyɛ eneekwɔ na ka nu ikpɔkpɔ gbobu, man eneekwɔ bɛyi ikpɔkpɔ duu ka nyanya. Kyɛmɛ yɔ a ka kye eneekwɔ ofufɛ yaokɛ ikpɔkpɔ ofufɛ.>>

*Otɛ mgbi egbe otonyewo mgbi
emi iJuda*

²³ Egbe otonyido mgbi emi iJuda oka nɛ, iYesu le kyikye nye okwo ungwogyowe, dafi engwafoon wafɔ yan le kɛ nɛ, a wita ole ngwunu ungwogyowe.

²⁴ Emi iFarasi gbo yan gbɛɛ, <<Dika, kyosine ngwi a le kyungwo nli ola ba mi egbe otonyewo ngha?>>

²⁵ IYesu si nya ma gbɛɛ, <<Ema gbo ungwɔ ngwi iDevedi yi emi ibugen nose kyo mi onɔ ngwi enbwa do ma ngwi a di dze mi imina na baa?

²⁶ Mi onɔ ngwi Abiata nose li okwukwo inggise ofife mgbi Imgbasho mani, iDevedi kaka ozu mgbi Imgbasho ka gye ibredi ngwi a kye mse be ele kye dzeke kyoon, ngwi ola gbɛɛ li ama ofife mgbi Imgbasho ta ka gye mani. O di kye nu emi ibugen kpaa.>>

²⁷ Nɛ iYesu nya ma gbɛɛ, <<A ta egbe otonyewo mi ikye inggise, li inggise ngwi a ta mi ikye egbe otonyewo ba.

²⁸ Nghane Ongwe Inggise li Otse mgbi egbe otonyewo kpaa.>>

3

Inggise nkwulu abɔ

¹ Onoka nɛ iYesu kɛ ozu okwakye mgbi emi iJuda, man inggise nkwulu abɔ dze ele.

² Angbeka mi ele le pita itɔdze ni ama kye abɔ byi efu nun obube, nghane a gbe ine fyakwun ikye odi non ka ngyelu inggise na ootse mi egbe otonyewo yo.

³ Nɛ iYesu nya inggise okwulu abɔ na gbɛɛ, <<Kyato dzekunto mi inai ali inggise duu.>>

⁴ Ta iYesu byi ma gbɛɛ, <<Li ole nghao li ola mi egbe otonyewo: okyɔ osuse naadi okyɔ obube, odulu oshishe wato naadi ongwɔɔngwɔ?>> Kpaa a gbɔdze onyi ba.

⁵ O kyidi ma kpatse yi itingga man i kakan ewo lu byulu mi itukwu otiishu mgbi ama nani, iYesu nya inggise na gbɛɛ, <<Na abɔ mgbi abu.>> O nan to, man abɔ mgban byakpa yɛɛ saan.

⁶ Man emi iFarasi ntona tase lu ka tsewe yi emidi iHerude dafi ama ka kyo duse ngwɔ iYesu mani.

Ijiji inggise kyɛdo iYesu

⁷ Man iYesu tase yi engwafɔɔn lu uto iGalalia, ne ibyi inggise mi iGalalia kyɛdon.

⁸ Ngwi a fwo alungwɔ ngwi o le kyo ne, inggise kwuba mi iJudia, iJerosalin, Idumia yi imbe angbeka mi oyombo ekyoo iJodan beyi imbe angbeka kwekwe yi ogalu iTire yi iSidon ba mbon.

⁹ Ikyegbɛɛ inggise mbwo lamyɛ ne, iYesu nya engwafɔɔn gbɛɛ nu ma pita ongwuwaa dze fɛɛfɛ ongwu, di a wa dzi ongwu beke esɛ.

¹⁰ Lubana o ngyɛlu inggise kwuba ootse, nghane ama nto yi ootse idzidza-dzidza le na kiyayi ikye ni ama kye abɔ gbon.

¹¹ Alono ngwi onodzi okpekpe din yo, a li gbese lakiyayi mbon dile makwɔ gbɛɛ, <<Abu li Ongwe Imgbasho.>>

¹² Nghaduu o wo ma ola kpakpa gbɛɛ nu ma ka gbɔ nya inggise onyi ito inggise ngwi ongwu dze ba.

IYesu sadu ama ogbikyon iwyodefa

¹³ IYesu tɔ lu esho mi ewunggwɔ si kwu ama ongwu mina ma ela, ta a ba mbon.

¹⁴ Nɛ o sadu iwyodefa mboma gbɛɛ nu ma li ama ogbikyɛ ongwu, ikyegbɛɛ nu ma dɛɛ yi ongwu, ni ongwu di dɔ ma tase ka gbeeso

¹⁵ odi dɛɛ yi mfye ngyɛlu ootse di lɔ onodzi ibwubwe tɔ.

¹⁶ Ntonɛ li iwyodefa ama o sadu ma aani: iSaimɔn (ongwu o nun iyi di iPyita)

¹⁷ iJensi ongwɛ iDzebedi beyi ongwunɔn iJɔn (mboma o nu ma iyi di iBonege, ngwi itan gbɛɛ emi ongwɛ akpala),

¹⁸ Andru, iFyilipi, iBatlomi, iMatiu, iTɔmɔsu, iJensi ongwɛ Alfeɔ, iTedusu yi iSaimɔn Ogbodami

¹⁹ beyi iJuda Iskarɔti, ongwu nkyɛ iYesu gya nani.

IYesu beyi uto mgbi onodzi emɛɛ

²⁰ Nɛ iYesu kaka udɛ, ta ibyi inggise di kwakye kpɔɔ, man iYesu yi engwafɔɔn yagba ogye ungwogye kpaa gbɛ ba.

²¹ Onɔ ngwi etɔ mgban fwo odzɛ nɛ nɛ, a lu ikyɛ oka gbekabyin, ikyekyɛ a gbɛɛ, <<O dɛɛ mi odzɛɛdzɛ mgban wuba.>>

²² Man ama otso ola mgbi iMose nkyɛ mi iJerosalin gbɛɛ, <<Onodzi iBedzɛbu wodzɛ mbi inggise nɛni! O dile lɔ onodzi emɛɛ tɔ mi mfye nani.>>

²³ Nghanɛ iYesu kwu ma ela gbɔdzɛ yi ama mi utsa gbɛɛ: <<ISatan ka lɔ iSatan onya tɔ sine?

²⁴ Ni esuto gha yi ewoma, esuto na ka yagba kwudzɛ gbɛ ba.

²⁵ Ni ude gha yi ewoma, ude na ka yagba kwudze gbe ba.

²⁶ Ma ni iSatan kye afo twese yi ewon di ye gha, o ka kwudze gbe ba; ongyeengye mgban ba sewaali.

²⁷ Mi odzimo yo, inggise onyi kpaa ka yagba kaka ude inggise mfyee gben okye ba, sede o ka tsekise bwa inggise mfyee na adi. Duuse o ka gben okye.

²⁸ N nya ema otsitsi, ali ibwubwe yi ito ngwi inggise le fya Imgbasho duu a ka kye toma mkpa.

²⁹ Nghaduu inggise ta nkwu Onodzi Osaan fyito, a ka dzanta yi obube ba; ikyekye o kyo alobube nli gyegwu.>>

³⁰ IYesu gbodze ne ikyekye a le gbæ, <<O dze yi onodzi obube mbon.>>

Ono iYesu yi emi ongwunon

³¹ Ne ono iYesu yi emi ongwunon wa to. A kwulese mi ese si do inggise oka ke ifun oka kwun ela.

³² Ibyi inggise sise kpakeke won, a si nyan gbæ, <<Onabu yi engwunabu to ese le pita abu.>>

³³ IYesu si byita gbæ, <<Li angbele li emi onani yi engwunani?>>

³⁴ Ta o ndine mbi ama nso kpakeke won ma si gbæ, <<Dii, ntone li emi onani yi engwunani aani!

³⁵ Ali inggise nkyo owitukwu mgbi Imgbasho li ongwunani ongyulo yi ongyaa beyi onani.>>

4

Utsa mgbi inggise ofwe eto

¹ IYesu di wita otso ma mi ondu utu. Ibyi ama nkpakeke won ma mbwo nyese neta, o kaka soke

ifu uwaa nbedze uto mani, inggise ntona duu kwutoke agobo.

² O tso ma ungwɔ kwuba mi utsa, mi otsootso mgban ma o gbɛɛ:

³ <<Gado! Inggise okwɔ tase oka fwe eto.

⁴ Dafi o le fwe neta, angbeka ngwuta mi ofe, ingwunɔ wa kye salu gye.

⁵ Angbeka ngwuta mi akwutse, imbe ngwi ekye me ma saan ba, a ndzili labɔ-labɔ, ikyekye ekye na le hilehile.

⁶ Ngwi onɔ wa tse ne, a gbufyo, kwulu ikyekye a sulu akpa ba.

⁷ Eto angbeka yaokɛ ato, ato ntona she tukwu ma, man a yagba fwe ba.

⁸ Nghaduu eto angbeka yangwuta mi ekye osuse, lu tɔ, i she diyɛ wa kwuba, ngha ongwɔ ababɔ na akpe osudiwyo, ngwuseta, hona akpe ideli kpaa.>>

⁹ Ta IYesu gbɛɛ, <<Inggise nsulu ado ofwoofwo yɔ, no fwo.>>

¹⁰ Ngwi o kwudze yuon ne, emi iwyodefa beyi ama nkpakɛke won ma byun ita mi utsa nani.

¹¹ O nya ma gbɛɛ, <<A kye ungwɔ odaada mgbi esuto mgbi Imgbasho kye gbɔ nya ema. Kpaa ama nto ese yɔ, alungwɔ duu sede ka li mi utsa ngwi a ka gbɔn nya ma

¹² ikye,

<< <Nu ma di kpaa,
a ka sakwulun ba,
nu ma fwo kpaa,
ka gbosa loma ba;
kana a ka wa kyata

nu ma dzita ma yi ali ibwubwe!> >>

13 Ta iYesu byi ma gbɛɛ, <<Utsa nɛ gbosa lo ema lo? Nghama ka kyɔsine ngwi utsa oka ka gbosa lo ema?

14 Inggise okwɔ kye elodze Imgbasho fwe.

15 Inggise angbeka to dafi eto n yangwuta mi ofɛ nani. Labɔlabɔ ngwi a fwo mata, iSatan wa kye gbɛlu elodze ngwi a kye fwe mboma mani.

16 Angbeka to dafi eto n yangwuta mi imbe akwutse mani, a fwo elodze na akponyi ta a kye gbɛlu yi atsa.

17 Nghaduu ngwi a dze yi akpa ba nɛ, a dze onɔ gwee ta. Ngwi okakewo hona iso wa ba mi ikye elodze na neta, a byakpa ye atata.

18 Angbeka di to dafi eto ngwi a fwe yaoke ato mani, a fwo elodze neni;

19 kpaa okakewo mgbi ɛɛ nɛ, okpagyewo mgbi aludu, yi imina mgbi ungwɔ angbeka wa kaka, di dze elodze nɛ mmyɛ, no wa wuba.

20 Angbeka to dafi eto ngwi a fwe mi ekye osuse, a fwo elodze na kye gbɛlu, i wa ngha ungwɔ ngwi a kye fwe na akpe osudiwyo, ngwuseta, ideli jokpaa.>>

IPitila mi ikye adinyatse

21 O di byi ma gbɛɛ, <<Ema li kye ipitila kaka ikye okye mgboko tukwun, hona kye woke ifag-wudoo? Li mi ikye adinyatse ngwi ema li kye dɔke baa?

22 Lubana ungwɔ ndze mi odaada duu ka yɛɛ gedee, alungwɔ ngwi a di kye tukwulu kpaa ka dɔ ɛɛ mi ododa.

23 Inggise ndze yi adɔ ofwoofwo yɔ, no fwo.>>

24 O kiyayi gbɛɛ, <<Kye eka byi saan mi ungwɔ ngwi abu fwo mani, li ombaamba ngwi abu mba

ma ngwi a ka mba nu abu aali, jo nghaangha kpaa.

²⁵ Ali inggise nsulun yɔ a ka ye mbwon, ongwu nsulun ba ma, ogwee ngwi o dzeyan ma kpaa a ka kye gbelu mbon.>>

Utsa mgbi eto oshæshæ

²⁶ O diye gbæ, <<Esuto mgbi Imgbasho dze sini: dze dafi inggise kye eto ungwɔ fwe mi ikpæse mani.

²⁷ Otu yi onɔ, ki non lasisa hona le nuna kpaa, o ye dafi i kyɔ se eto na le she ba.

²⁸ Li ikpæse li nu ungwogye lumbye, ababɔ itan li tɔ, man li wa ngwiide, se wo inenæ.

²⁹ Labɔ-labɔ ngwi eto na mye mata, o li kye agæbæ dɔkæ ele, ikyekye onɔ ongwa eto gyɔ.>>

Utsa mgbi inenæ unkwodzi

³⁰ IYesu diye gbæ, <<Li alungwɔ ngwi eyi ka gbæ esuto mgbi Imgbasho lun, naadi li ali utsa ngwi eyi ka kye tso ambæ mi ele?

³¹ Dze dafi inenæ unkwodzi, nshanye ngha inenæ ali ekwɔ ngwi abu kye ye mi ikpæse mani.

³² Nghaduu ni a kye ye, li she di yæ gbag-badzidzi ngha ali ekwɔ mi okwɔ duu, li tsaabɔ okwukwo jo ingwunɔ emi esho kpaa li ba wa lude mi abɔn.>>

³³ Yi utsa mbitɔ ntonæ, iYesu gbɔ elodze nɛ yi ama, o gbɔn kwuba gyɔ nu ma difwi mani.

³⁴ O li dzedze gbɔdze yi ama ba sede mi utsa. Nghaduu non wa tɔ yuon yi engwafɔ mgban yɔ, o li nu ma osa mi alungwɔ duu.

IYesu nu awo kwulu

³⁵ Onɔɔɛ mi egbe nani, o nya engwafɔɔn gbɛɛ,
<<I kɛ oyombo na.>>

³⁶ Ngwi a dzata ibyi inggise mi iyikpa nɛ, a kye
iYesu wafɔ yi ama, mi uwaa ngwi o tsekise sɔɔɔɛ
efu mani. Uwaa angbeka kpaa kyɛɔn.

³⁷ Onikyawo gbokyɛɛ, gbe akpeni le yaokɛ uwaa
jo uwaa dɛ kwɛkwɛ osulu.

³⁸ IYesu ladɛ ifu uwaa kye ikye dɔɔɔɛ ungwɔ
okye ikye dɔ efu le nuna, engwafɔɔn kyilon, a
byun gbɛɛ, <<Otsetse, ni eyi mbe eni kwulu kpaa
li itɔɔɔɛ mbi abu ba lɔ?>>

³⁹ O gbokyɛɛ, feela yi awo diyɛ nya akpeni gbɛɛ,
<<Dede! Dɛ shilididi!>> Man awo kwulu, imbe
yɛɛ tsiin!

⁴⁰ O nya engwafɔɔn gbɛɛ, <<Kyɔsine ngwi ema
tsimio ngha? Ema sulu oyɛyɛ onuunu walo?>>

⁴¹ Idzidzi kwulu ma, a yɛ byi ewoma gbɛɛ,
<<Nɛnɛ li emɛ? Ngwi awo bɛyi akpeni kpaa li
fwon?>>

5

IYesu lɔ onodzi emɛɛ tɔ mbi inggise

¹ A foyombo uto lu ayɛɛ iGeraseni nani.

² Ngwi iYesu tase mi uwaa mata, ongyulɔ oka yi
onodzi okpekpe tɔ mi imbe endzi wa tun.

³ Inggise nɛ li la imbe endzi, inggise onyi dzɛma
nka bwan adi gbe ba, kwoba yi ashi kpaa.

⁴ Bana a li teyi bwan afɔ yi abɔ, kpaa o li byi ashi
yi iyudza ntona kye gbɔɔɔɛ dulu afɔ tɔ. Inggise
onyi fyumfye mɛ osin bɛɛ ba.

⁵ Otu yi onɔ mi imbe endzi bɛyi undɔ ntona o li
le teela diyɛ dɛ ewon ifwa mi akwutɛ.

⁶ Ngwi o dili iYesu mbombo mata, o tsinya ka gbe akwafo kwoke ese mfyumfye mi iyayi iYesu.

⁷ O feela kpakpa, <<Li ekye wo abu yi ani. IYesu, Ongwe Imgbasho ngwu ngha mi esho? Fa mbi Imgbasho gbɛɛ abu ka nu ani adze ba!>>

⁸ Ikyesine iYesu teyi nyan gbɛɛ, <<Abu onodzi ibwubwe tase mbi inggise neni!>>

⁹ Ta iYesu byun gbɛɛ, <<Iyi abu di emɛ?>>

O nu uka gbɛɛ, <<Iyi ani gbɛɛ ibyibyi, ikyekye eyi le kwuba.>>

¹⁰ O si tekye diye gbaɔ nu iYesu gbɛɛ, no ka lo ama onya dzata imbe ne ba.

¹¹ Obyia ibyibyi tole gye ungwogye kwekwe mi undɔ mi imbe nani.

¹² Onodzi ibwubwe ntona tekye nu iYesu gbɛɛ, <<Lolu eyi kaka obya ntoneni; noofɛ ni eyi kaka mboma.>>

¹³ O nu ma ofɛ, man onodzi ibwubwe ntona tase lu ka yaoke mbi obya ntonani. Obyi obya na me dafi idubu efa sini, a tashulu mi agblo yaoke uto si dzili.

¹⁴ Ama ongyo obya ntona tsinya lu ka gbɔ mi igeli beyi ayese nani. Inggise gbe ewoma tase le wa di ungwɔ nkiyayi mani.

¹⁵ Ngwi a ba mbi iYesu ne, a si di inggise ngwu ese gbeka don ikye nani, sodze mmama, wo angwuto, itukwu mgban yee saan, man a tsimio.

¹⁶ Ama ndi mani a gbɔ nya inggise ungwɔ nkyɔ ongyulo ngwu ese don ikye nani, beyi odze mgbi obya ntona kpaa.

¹⁷ Nghane inggise ntona wita oteekye nu iYesu gbɛɛ no dzata ayese mgbi ama.

¹⁸ Dafi iYesu le kaka ifu uwaa nɛ, inggise ngwu ese don ikye na tekye gbɛɛ ongwu ki lu yan.

¹⁹ IYesu gbela ba, kpaa o gbɛɛ, <<Lu ude mbi eto mgbi abu dika nya ma ungwɔ okwukwo ngwi Otse Imgbasho kyo yi abu, beyi ito elela ngwi o di abu neni.>>

²⁰ Inggise na si lu ka wita le gbɔ mi iDekapoli (ogalu iwyo ntona) ungwɔ okwukwo ngwi iYesu kyo mi ikye mgbi ongwu nani. I si kwulu inggise duu ewo.

Ongwongyaa Ikwukwo beyi Ongyaa Odotse

²¹ Ono ngwi iYesu diye fa mi uwaa dɔke oyombo uto nɛ, ibyi inggise kwuba kpakeke won ngwi o kwudze ondu uto mani.

²² Man onyi mi idzidze mgbi ama oteyi mi ozu okwakye mgbi emi iJuda, iyin di iJarua badze imbe nani, ngwi o dili iYesu neta o si lanke ese mi iyayi,

²³ diye tekye nun saan gbɛɛ, <<Ongwani ongyaa ongwu ongbungbe le kwulu, tsuutsu ba wa kye abɔ mgbi abu gbon ewo azukwu ni ewo mgban gbosa no dze oshishe.>>

²⁴ Nghane iYesu wafɔ yan.

Ijiji inggise kyan iyikpa kwuba, imbe flengba lon.

²⁵ Ongyaa oka kpaa dze mmana ngwu teka ogyiye onova iwyodefa.

²⁶ O gyiso kwuba mi abɔ mgbi ama obwe ootse, di kye mbelu ungwɔ ngwi o sulun duu, ngwi ewo kika gbosa nɛ ootse nghao kekiyayi.

²⁷ Ngwi o fwo odze iYesu nɛ, o si gbuoke idzidze inggise wa kye abɔ gbon angwuto mi iyikpa,

²⁸ ikyekye o tsɛwɛ gbɛɛ, <<kini ani kye abɔ gbon angwuto kpaa ta, ootse mgben ka ngyɛ.>>

²⁹ Labɔlabɔ nɛ eyi odɛɛdɛ mgban dɛɛ man o si difwi mi idzidzɛ ewo mgban dafi iso na gbosa mani.

³⁰ IYesu jakpa difwi akponyi dafi mfye to lo ongwu mi ewo mani. O kyata inɛ byi ibyi inggise ntona si byita gbɛɛ, <<li emɛ kye abɔ gbo ani angwuto?>>

³¹ Emi ongwafɔ mgban nun uka gbɛɛ, <<Abu di inggise tsiibyɛ wo abu, kpaa abu dile byita gbɛɛ, <Li emɛ kye abɔ gbo anii?> >>

³² Nghaduu iYesu kiyayi ondine inggise nkɔyɔ ngya mani.

³³ Ngwi ongyaa na difwi ungwɔ nkɔyɔ nɛ, o si ba wa lake esɛ mi iyayi iYesu, ewo le shiishi lon yi imio, o si nyan otsitsi ungwɔ ndzɛ duu.

³⁴ O nyan gbɛɛ, <<Ongyaa, oyɛyɛ onuunu mgbi abu ngyɛlu abu ootse. Kɛ ise diyɛ to mi iso mgbi abu nɛni.>>

³⁵ Ngwi iYesu kale gbɔdzɛ nɛta, engyulo angbeka tokye uɔɛ iJarɔ, inggise oteyi mi ozu okwakye mgbi emi iJuda. A gbɛɛ, <<Ongwabu kwulu ma li ekye ngwi abu kale kaka otsetse ewo?>>

³⁶ IYesu gbadikye mi odzɛ ngwi a gbɔ na man, O si nya ongyɛ oteyi ozu okwakye mgbi emi iJuda na gbɛɛ, <<ka tsimio ba, noyɛyɛ ta i ngyɛ.>>

³⁷ O nu inggise onyi kyan iyikpa ba sede iPyita, ijensi yi ijɔn ongwunɔ ijensi ta.

³⁸ Ngwi a ba uɔɛ ongyɛ oteyi ozu okwakye mgbi emi iJuda nɛ, iYesu di imbe yɛɛ yuu yi akwɔ bɛyi ikwu otsetse mi ela okwukwo.

³⁹ O kaka ifun di nya ma gbɛɛ, <<I kyɔsine ngwi ema nu imbe suusu yi ikwu otseetse ngha? Ongwɛ nɛ kwulu ba kpaa o nanuna ta.>>

⁴⁰ Nghaduu a shan isha.

Oɔ ngwi o nu ma tase nɛman, o kyi kyelu ama omban beyi engwafɔ mgban nghi eta ntona kaka ifoozu imbe ngwi ongwe se ladze mani.

⁴¹ O kpalun abɔ nyan gbɛɛ, <<Italita kumi!>> (Itan gbɛɛ, <<Ongwongyaa ongbungbe, ani le nya abu gbɛɛ, kyato!>>).

⁴² Labɔlabɔ neta ongwongyaa na kyɛɛ dzekunto le kyikye yilili kpatse (o li onova iwyodefa). Mi ungwɔnɛ i kwulu ma ewo saan.

⁴³ O wo ma ola kpɔklɔ gbɛɛ nu ma ka nu inggisɛ onyi ye odze ele ba, o diye nya ma gbɛɛ nu ma nun ungwogye no gye.

6

A fwa iYesu mi iNadzareti

¹ IYesu dzata imbe na ye lu igeli mgban, emi ongwafɔɔn wafɔ yan.

² Ngwi egbe otonyido mgbi emi iJuda wa gyo nɛ, o wita otso mi ozu okwakyɛ mgbi emi iJuda, i kwulu ibyi inggisɛ ama nfwo ma ewo.

A byita gbɛɛ, <<Li mi ole ngwi ongyulo nɛ tu ungwɔ ntonɛ? O tu ito ozoyeye nɛ mi ole jo le kyungwɔ ama okwulewo nɛ ngha lo!

³ Nɛnɛ li inggisɛ ogbokwo ungwɔ nɛ baa? Ongwɛ iMeri ongwunɔ yi iJensi, iJosisi, iJuda beyi iSaimɔn nɛ ba na? Emi ongwunɔn engyaa to yi eyi den baa?>> Man itukwu wulu ma yan.

⁴ IYesu nya ma gbɛɛ, <<Oyegbo li dze yi mmwe mi igeli, yi eto beyi ude mgban ba.>>

⁵ IYesu gbela kyungwo okwulewo mi imbe na wuba, sede li inggise emi ootse gwee ta ngwi o kye abo gbo ma ewo nu ootse mgbi ama ngye.

⁶ I kwulu iYesu ewo yi okwoba-kwoba oyeye onuunu mgbi ama nani.

*IYesu do engwafon iwyodefa
ntone eso*

Ta iYesu kyikye kpatse le tso mi agwo agwo.

⁷ Ngwi o kwu iwyodefa ntona ela ba mbon ne, o si kwu ma be efa efa do ma eso, diye nu ma mfye ongha onodzi ibwubwe.

⁸ Li ola ama ngwi o woma aani: <<Mi agaba ne, ka kye unkonyi byi ba na, ibredi ba, igbe ba, awuya mi ashiko ba sede okwuta ta.

⁹ Gbe okpafu wo na, kpaa ka gbe abu ngbi efa byi ba.

¹⁰ Ali ude ngwi ema ka kaka duu, dze ele nghataa mbiso ngwi ema ka dzata igeli nani.

¹¹ Ali imbe ngwi a gbe ema hona fwo ema bayo, kye gbolu ombulu mi afu mi ono ngwi ema le lu mani, no yee obwendu obube mi ikye ma.>>

¹² A tase ka gbeeso gbɛɛ inggise nu ma kyati-tukwu.

¹³ A lo emese onya to mbi inggise kwuba, di kye engyie kyi inggise ama ndotse kwuba ikye di ngyelu ma ootse.

A dze ifon okyo iBatisima ikye

¹⁴ Uto iHerude fwo odze neni, dafi iyi mgbi iYesu gbafwe kpatse mani. Angbeka tole gbɛɛ, <<Ifon

okyo iBatisima kye mi ikwu, li nga ngwi mfye ama okwulewo le kyido nye mbon aali.>>

¹⁵ Angbeka gbɛɛ, <<O li Elaija.>>

Angbeka kiyayi gbɛɛ, <<O li oyegbo, ndze dafi onyi mi idzidze oyegbo emi tugbe ntonani.>>

¹⁶ Nghaduu ngwi iHerude fwo ungwɔnɛ nɛ, o gbɛɛ, <<Ijon inggise ngwu ani dzan ikye na, ye kye mi ikwu!>>

¹⁷ Bana iHerude abuan noola nu ma bwa ijon, nu ma bwan adi di kyon ka woke obawi. O kyungwɔnɛ nga mi ikye iHerodia, owa iFyilipi ongwunon ngwu o gbɛlun yɛɛ owan nani.

¹⁸ Bana ijon teyi le nya iHerude gbɛɛ, <<Li ola ba ni abu gbɛlu ongwunabu ongyaa.>>

¹⁹ Neman iHerodia sulu owitukwu obube yi ijon jo i minan ongwɔn kpaa o yagba ba,

²⁰ ikyekye iHerude le mio ijon dile ngyon, ikyesine o yon dafi o li inggise onyaan dile saan mani. Ngwi iHerude fwo ijon neta ewo fwe lon, jokpaa i kpan ole fwon.

²¹ Mi ongyɛnggyɛ nɛ onɔ osuse wa ba. Mi egbe ombaamba mgban, iHerude kyo oga mi ikye mgbi emi ido mgban ama okwukwo yi oblakwutse ama onoola beyi engyulo ama oteyi ɛɛ iGalalia.

²² Ngwi ongwɛ iHerodia ongwu ongyaa ba idzidze wa shufwe nɛ, i nu iHerude beyi ingyoga oga mgban atsa.

Uto nya ongwongyaa na gbɛɛ, <<Bo ani ungwɔ ngwi abu mina duu ani ka kye nu abu.>>

²³ Man o zondy yan mi ofaafa gbɛɛ, <<Alungwo ngwi abu bo duu n ka nu abu, ka mɛ anggai esuto mgbi ani.>>

²⁴ Ongwongyaa tase ka byi onon gbɛɛ, <<Li ekyɛ ngwi ani ka bɔ nu ma kye nu ani?>>

Onon gbɛɛ, <<Ikye mgbi iɔn okyɔ iBatisima.>>

²⁵ Ongwongyaa byakpa yewo lu ifun mbi uto yi ibɔ nani: <<Ani mina ikye mgbi iɔn okyɔ iBatisima mi akpetɛ oneneni.>>

²⁶ Itukwu wulu uto kpakpa, nghaduu, ikyegbɛɛ o teyi fa mi inai ingyoga mgban nɛ, o yagba kwɔn gbɛ ba.

²⁷ O byakpa wo ongye ongwɔ inggise ola gbɛɛ no ba yi ikye mgbi iɔn akponyi. Inggise na ka kye dzɛlu iɔn ikye mi obawɪ,

²⁸ si yɛ yi ikye ma mi akpetɛ. Wa nu ong-wongyaa se, ta o kye ka nu onon.

²⁹ Ngwi a fwo ungwɔnɛ nghanɛ, engwafɔ mgbi iɔn wa kye ikwɔ mgban ka ndzi.

IYesu byi inggise idubu eda enbwa

³⁰ Ama ogbikye iYesu yɛ wa kpakɛkɛ won le nyan ungwɔ ngwi ama kyo diye tso tsatsa.

³¹ Nɛ ikyegbɛɛ ibyi inggise angbeka tole ba ba angbeka tole lu lu ngwi a tu onɔ ogye ungwɔ kpaa ba nɛ, o nya ma gbɛɛ, <<Bakɛ yi ani mi imbe ndede ni ema ka tonya na.>>

³² Nghanɛ a wafɔ yi ewoma mi uwaa dzɛkyo lu mbi imbe dede mani.

³³ Nghaduu ibyi inggise di dafi a le lu nɛ, a difwi ma di ye imbe ngwi a le kɛ mani ta a tsinya tɔ mi igeli duu kye mwaamwa teyi ma ka kaka.

³⁴ Ngwi iYesu tase mi uwaa diye dili ibyi inggise nɛ, elela kyɔn wo ma, ikyekye a yɛɛ dafi mmala ama ndzɛ yi inggise ongyo ma ba mani. Ta o di tso ma ungwɔ kwuba.

³⁵ Mi onɔ na, dafi onɔ le gbese wa, ne engwafɔ mgban ba mbon, wa nyan gbɛɛ, <<Imbe ne li ifoshe, onɔ di ke byulu.

³⁶ Nu inggise ntonɛ ofe zukwu nu ma lu ogalu ama nto kwekwɛ ka gya ungwogye abuoma gye.>>

³⁷ Nghaduu o gbɛɛ, <<Ema kye ungwɔ nu ma gye na.>>

A nyan gbɛɛ, <<Nana ka mɛ udza ofyia egyata mgbi inggise idɔ onyi! Ni eyi ka mbe itɔ udza na kpakpa ogya ibredi nu ma gyee?>>

³⁸ O byita gbɛɛ, <<Ema sulu ibredi olɔlɔ nghi emine? Ke ka kyidi na.>>

Ngwi a ke ka kye gbɔlu nɛ, a gbɛɛ, <<IBredi olɔlɔ nghi eda yi abatsa efa.>>

³⁹ Nghanɛ iYesu nu ma elodze gbɛɛ, nu ma nu inggise ntonɛ duu sise ibwi-ibwi mi oshɛ indinda neni.

⁴⁰ Man a si sise mi otsotsa, ideli ideli beyi ngwusefa don iwyiwo.

⁴¹ Ngwi o kyi kyelu ibredi eda yi abatsa efa ntona, di kyile inɛ esho nɛ, o kye angba nu Imgbasho man kye mwalu ibredi ntonani. Kye nu engwafɔn gbɛɛ nu ma kye gha ibyi inggise ntonani. O di kye ghalu abatsa efa ntona gyaakye ma duu.

⁴² Ama duu gye tolo.

⁴³ Engwafɔ mgban kye salu ambulu ibredi yi abatsa nsisi ma mbwo uya iwyodefa kyɛɛ-kyɛɛ.

⁴⁴ Mmbwo engyulɔ ama ngye ma li idubu eda.

IYesu kyikye mi ikye eni

⁴⁵ Ngwi iYesu le wo ibyi inggise ntona ofe nɛ, o nu engwafɔn ple kaka uwaa teyun lu iBetsaida,

⁴⁶ Ngwi iYesu dzata ma nɛ, o tɔkɛ lu ewunggwɔ le ka bibɔ.

⁴⁷ Mi oba onɔdɛ nɛ, uwaa kye ama ntona ka to idzidzɛ utɔ, ongwu tila dzɛ esɛ yuon.

⁴⁸ O di engwafɔ mgban tole gbili yi akpeni, ikyekyɛ awo le nu ma okakewo, mi obyɛ enɛ ongwɛ ikyegbe o tɔ ka tu ma, le kyikyɛ mi ikye eni. O ba dafi o ka wa nyɛ ma mani,

⁴⁹ kpa ngwi a di dafi o le kyikyɛ mi ikye eni nɛ, a tsɛwɛ gbɛɛ o li onodzi inggisɛ ikwukwɔ. Man a gbobakwɔ,

⁵⁰ ikyekyɛ ama duu din tsimio.

Mi onɔ nata, o si nya ma gbɛɛ, <<Fyumfye itukwu na! Ka yama mio ba na, li ani.>>

⁵¹ Nɛ o kaka uwaa yi ama man awo kwulɛɛ akponyi. Ta ewo fwe loma tsatsa,

⁵² ikyesinɛ ungwɔ okwulewo mgbi ibredi na gbosa loma ba; lubana a kye itukwu tiishu.

⁵³ Ngwi a dzɛkyo nɛ, a ka bɛɛɛ mi iGenesareti di kye uwaa shadi mi ele.

⁵⁴ Labɔlabɔ ngwi a tɔ mi uwaa nɛman inggisɛ byakpa dilifwi iYesu.

⁵⁵ A wulu onya mi ayɛɛ na duu gbe emi ootse mi obutu lukwun kɛ imbe ngwi a fwo gbɛɛ o dzɛ duu.

⁵⁶ Ali imbe mi agwɔ ngwi o kɛ duu, igeli hona agya ɛɛ, a li gbe emi ootse wa lakɛ ifyidu. A gbabɔ nun gbɛɛ o ki nu ama kye abɔ gbo-gbo ondu angwuto mgban kpaa ta, ama nkye abɔ gbon duu ewo gbosa loma.

7

Osaan beyi okpekpe

¹ Emi iFarasi beyi etsetse mgbi ola mgbi iMose angbeka ama nkye mi iJerosalin kpakεke wo iYesu man

² a di engwafɔ iYesu angbeka le gye una yi abɔ <<oshimbi-shimbi>> ali ma, a sabɔ ba.

³ (Emi iFarasi yi emi iJuda duu a li dze-dze ta gye ungwogyε ba, a li sabɔ mbisɔ ola mgbi ama ma se, okyɔ aletɔ mgbi ama.

⁴ Kini a ye yi ungwogyε mi idu, a li nye-nye gye ba sede a ka san. A di li kyɔ aletɔ mgbi ama angbeka kwuba, dafi osa ibwe yi okye ama okyɔ ungwogyε beyi emi uga sini.)

⁵ Nghanε emi iFarasi yi etsetse mgbi ola mgbi iMose byi iYesu ita gbεε: <<Kysine ngwi engwafɔ mgbi abu li dze mi aletɔ mgbi engyukwo ba, ngwi a li gye ungwɔ yi abɔ oshimbi-shimbi ngha?>>

⁶ O gbεε: <<Adzaya gbɔ li ayin mi onɔ ngwi o gbɔ ela oyegbɔ mi odzε ewε mgbi ema; dafi a tsekise lɔ mani gbεε:

<< <Inggisε ntonε li nu ani mmwe
mi ikpɔkpɔndu ta,
nghaduu itukwu mgbi
ama dze mbombo yi ani.

⁷ A li sunu ani li ayayi,
Otsootso mgbi ama
li ola mgbi inggisε owamyε.>

⁸ Ema kye ola mgbi Imgbasho ngwuta yile abɔ byikε ola etɔ mgbi inggisε owamyε.>>

⁹ Man iYesu nya ma gbɛɛ: <<Ema li dze yi ofe nkpa ema okye abɔ byike ele kye ola mgbi Imgbasho ngwuta ye kyɛdɔ otsootso mgbi ema!

¹⁰ Lubana iMose gbɛɛ: <Nu otsabu yi onabu mmwɛ,> ma <Ali inggise ndi fya otson hona onon ito yɔ, nu ma ngwɔn kyemɛ.>

¹¹ Nghaduu ema li gbɛɛ li ayin ni inggise nya ama omba ma gbɛɛ, <Gyen aba, n ka yagba tobyi ema ba. Ikyesine n tsekise zondɔ okye ungwɔ ngwi ani kika kye nu ema ma, nu Imgbasho,

¹² nghanɛ ema li non kyɔ unkonyi kpaa mi ikye otson naadi onon wuba.

¹³ Ikyenghanɛ ema kye ngwɔlu elodze Imgbasho mi aletɔ mgbi ema ngwi ema gbeto emidema esɛ nani. Ema di li kyungwɔ kwuba ito nani.>>

¹⁴ IYesu diye kwu ibyi inggise ela ba mbon di gbɛɛ, <<Ema duu gadɔ mbi ani, di difwi ungwɔnɛ na.

¹⁵ Nkonyi nka kaka mbi inggise se ka non tsiidza dzema ba. Kpaa li ungwɔ ama ntɔ mbi inggise ba esɛ mani. Li ama li non tsiidza aali.>>

¹⁶ (Inggise ndze yi adɔ yɔ non fwo.)*

¹⁷ Mi onɔ ngwi o dzita ibyi inggise lu ka kaka ozu nɛ, engwafɔɔn byun ita odze mi utsa neni.

¹⁸ IYesu byita gbɛɛ, <<Ema yama difwi odze ani le gbɔ nɛ walo? Ema ye saan dafi ungwogyɛ ngwi abu kyi gye lu ifu ka nu abu <tsiidza> ba lo?

¹⁹ Lubana li lu itukwu mgban ba kpaa li lu ifu, di li yidɔ tɔ mi ewo mgban luba esɛ.>> (Mi odze

* **7:16 7:16** Ambulu nɛ dze mi olɔlɔ angbeka ba. Olɔlɔ angbeka kwuba kye dzeke enggenga.

ngwi iYesu gbɔ nɛ, o tso gbɛɛ ali ungwogye duu <<Mɛ ngwi a ka gye.>>)

²⁰ O kiyayi gbɛɛ: <<Li ungwɔ ntɔ mbi inggise ma li non <tsiidza aali.>

²¹ Lubana li mi itukwu mgbi inggise mi idzidze, li ba yi ɛwɛ otɕɛtɕe ibwubwe, amah-ibwubwe, mmyi, inggise ongwɔɔngwɔ, amah,

²² nggwɔ, okye inggise wo itukwu, okpagyewo, imina mgbi ali ibwubwe, odi tanyi, agya, ohaha beyi ikwangha.

²³ Ungwɔ ibwubwe ntonɛ duu li mi itukwu ngwi a li tɔ di li nu inggise <yɛɛ kpɛkpɛ aali.> >>

Oyɛyɛ onuunu mgbi ongyaa mi iSaroфонishia

²⁴ IYesu lu dzata imbe nani yɛ lu ewo igeli iTiru. O kaka ozu kpaa i minan gbɛɛ inggise onyi no ka ye ba; nghaduu kpaa o yagba kye ewon da ba.

²⁵ Dafi ongyaa ngwu ongwan dze yi onodzi ibwubwe ka fwo odze mgban nɛ, o ba wa gbɛɛ lanke iyayi.

²⁶ Ongyaa na li iGriki, a mban mi ayɛɛɛ iSiaфонishia mi iSiria. O tɛkyɛ nu iYesu gbɛɛ non lɔlu emɛɛɛ na tɔ mbi ongwan ongwu ongyaa.

²⁷ Nghaduu iYesu nyan gbɛɛ, <<Ababɔ ni engbɛ nu ma gye ungwogye dafi a mina duuse, lubana li ayin ba okye ungwogye ndze mi ikye engbɛ ngwuta nu obwe.>>

²⁸ Ongyaa na nun uka gbɛɛ, <<ɛɛn, Otɕɛ iYesu, obwe ama nlato ifo adinyatɕɛ ogye ungwogye mgbi engbɛ kpaa, li gye ambulu ama nngwuta mani.>>

²⁹ IYesu si nyan gbɛɛ, <<Mi ito uka ngwi abu nu ani nɛ, yɛ lu ude abu; emese na dzita ongwabu ongwɛ ongyaa na wa.>>

³⁰ O lu ude ta o ka di onghan ladze akwulo, dafi emese na teyi to mbon lu wa.

IYesu ngyɛlu inggise ikplima

³¹ Ta iYesu dzata ewo igeli iTiru yɛ nyɛ iSidon, lu uto iGalalia to lu ayese mgbi iDekapoli, igeli iwyo ntonani.

³² Inggise angbeka kye inggise nkyado di li fyonmfye ogbodze ba mbon, si tekye nun gbɛɛ no kye abo gbon ewo.

³³ Nghane o kyon lu enggenga, dzata ibyi inggise ntonani, iYesu gbe ongwufabo wonke ado. Man o kyangwo toke ongwufabo di kye be inggise na mi ide.

³⁴ Ta iYesu ndine ke esho diye sandu man o nyan gbɛɛ, <<Efata!>> (Itan gbɛɛ, <<kwulu!>>).

³⁵ Mi ungwɔ ngwi iYesu kyo nɛ, ado mgbi inggise na kwulu, ide mgban di sheta ta o wita ogbodze to saan.

³⁶ IYesu kwo ma ado gbɛɛ nu ma ka nya inggise onyi ba. Nghaduu ngwi o le kwunewo okwo ma ado nɛ, a nghao le kiyayi ogbodze mi ele.

³⁷ Ne ama duu ungwɔ okwulewo na kyi gbɛlu ma so. A gbogbɛɛ, <<O kyo alungwo duu saan, o nu ama okyado fwo di nu emi ikplima gbodze.>>

8

IYesu byi inggise idubu ene enbwa

¹ Mi egbe ntona ibyi inggise angbeka di kwakye. Dafi a dze yi unkonyi kpaa ngwi a ka gye ba ne, iYesu kwu engwafoon ela ba mbon si nya ma gbɛɛ,

² <<Elela kɔɔ ani wo inggise ntoneni; a to yi ani mmenɛ egbe eta waani, ma a dze yi unkonyi ogyeegye ba.

³ Kini ani nu ma ofɛ gbɛɛ nu ma lu uɔɔ yi enbwa ifu yɔ, a ka kwanadza mi ofɛ, ikyesinɛ angbeka kye imbe otunto.>>

⁴ Emi ongwafoon byun gbɛɛ, <<Nghanɛ li mi ole mi ifoshe ne ngwi inggise ka tu ibredi me obyɔ ma enbwa?>>

⁵ iYesu byi ma gbɛɛ, <<Li ibredi emine ngwi ema dzeɔyan?>> A gbɛɛ, <<Egyafa.>>

⁶ O nya ibyi inggise ntona gbɛɛ nu ma sise mi ombulu. Ngwi o kye gbɛlu ibredi egyafa ntona di ta Imgbasho angba ne, o kye mwalu gbe nu engwafoon gbɛɛ nu ma gha ibyi inggise ntonani, a si kɔɔ ngha.

⁷ A di dze yi engwe abatsa kpaa gwee, iYesu di ta Imgbasho angba mi engwe abatsa ntonani di nya engwafoon nu ma kye gha ma.

⁸ Inggise ntona gye di tolo. Ngwi a gye nye ne, engwafoon kye salu ambulɔ ama nsisi ma mbwo uya egyafa.

⁹ Inggise me dafi idubu ene to mi onɔ nani. Ngwi iYesu nu ma ofɛ nu ma lu neta,

¹⁰ o kaka uwaa yi engwafoon lu ayese iDamanuta.

Emi iFarasi mina ambe okwulewo

¹¹ Emi iFarasi ba mbi iYesu wa wita obyɔn ita. Ikye ombadin, a pita ambe ongwi esho mbon.

¹² O sandu lu byulu si gbɛɛ, <<Kyɔsine ngwi eto nɛ le mina ambɛ okwulewo? Otsitsi ani le nya ema, ambɛ onyi kpaa a ka kye nu ma ba.>>

¹³ Ta iYesu lu dzamata, yido lu ka kaka uwaa si foyombo uto na lu agya oka.

Okwuna mgbi emi iFarasi yi iHerude

¹⁴ Engwafɔ iYesu gblimɔ okye ibredi byi, sede li onyi ongwi a kye yan mi uwaa mata.

¹⁵ IYesu kwo ma ado gbɛɛ, <<Gbɛwɛbyi ewema na. Gbinɛbyi okwuna mgbi emi iFarasi bɛyi mgbi iHerude nani.>>

¹⁶ A kponya odzɛ nɛ yi ewoma si gbɛɛ, <<Li ikyegbɛɛ eyi dɛɛ yi ibredi ba mani.>>

¹⁷ IYesu difwi odzɛ ngwi a tole gbɔ yi ewoma nɛ, o byi ma gbɛɛ: <<Kyɔsinɛse ngwi ema le gbɔdzɛ gbɛɛ ema dɛɛ yi ibredi ba? Ema kale dinɛ ba naa kale gbosa lo ema ba maa? Itukwu mgbi ema tiishuu?

¹⁸ Ema dɛɛ yi inɛ kpaa li yagba di lo, di dɛɛ yi ado kpaa li yagba ofwo lo? Ema wɛ wulo?

¹⁹ Mi onɔ ngwi ani gha ibredi nghi eda mi ikye inggise idubu eda ma, ema gbe ambulu mbwo uya eminɛ?>>

A nun uka gbɛɛ, <<Iwyodefa.>>

²⁰ <<Ngwi ani di gha ibredi nghi egyafa mi ikye inggise idubu enɛ ma, li uya eminɛ ngwi ema gbe ambulu mbweele?>>

A gbɛɛ, <<Egyafa.>>

²¹ IYesu byi ma gbɛɛ, <<Kale gbosa lo ema ba maa?>>

*IYesu kwulu ongyulo obinɛ inɛ
mi iBetisaida*

22 A ba iBetsaida, man inggise angbeka kye ongyulo obine ba wa tekye nu iYesu gbɛɛ no kye abɔ gbon.

23 O byi ongyulo obine na abɔ di kyon tase dzata ogalu. Ngwi o kyanggwɔ kyin ine di kye abɔ ban ne, iYesu byun gbɛɛ, <<Abu di ungwɔɔ?>>

24 Obine na ndine ke esho si gbɛɛ, <<Ani di ibyi inggise, a to dafi ekwɔ mani le kyikye kpatse.>>

25 IYesu diyɛ kye abɔ gbon ine. Ta ine mgban kwulu, ine mgban ye, man o di alungwɔ duu saan.

26 Ne iYesu won ofɛ lu ude, di won ola gbɛɛ, <<Ka ye ke ogalu na wuba.>>

IPyita fwi iKrestu

27 IYesu yi engwafɔɔn lu kaka agwɔ ama nto kwekwɛ yi iSisiria iFyilipi. Mi ofɛ ma o byi ma gbɛɛ, <<Inggise li kwu ani di emɛ?>>

28 A nyan gbɛɛ, <<Angbeka li gbɛɛ ijɔn okyɔ iBatisima, angbeka gbɛɛ Elaija; angbeka yɔ li gbɛɛ, onyi mi idzidze ama ogbɛɛɛ.>>

29 Ne o byita gbɛɛ, <<Nghane ema ma! Ema li kwu ani di emɛ?>>

IPyita nun uka gbɛɛ, <<Abu li iKrestu mani.>>

30 IYesu kwo ma adɔ gbɛɛ nu ma ka nya inggise onyi odze mgbi ongwu ba.

IYesu gbɔdze ikwu ewon

31 Ta iYesu wita otso emi ongwafɔɔn gbɛɛ Ongwe Inggise ka gyadze ungwɔ kwuba kyeme, engyukwo dika fwan, engyukwo ama ofife, beyi etsetse mgbi ola mgbi iMose. A ka ngwɔn mi egbe ongwu ta o dika kyɛ mi ikwu.

32 O gbɔdze ne mi ododa yi engwafɔɔn, man iPyita kyen lu enggengga sika wita okyɔkyɔ yan.

³³ Kpaa ngwi iYesu kyata ine di engwafɔɔn nɛ, o fwa yi iPyita. O nyan gbɛɛ, <<Kwleke mmenɛni iSatan! Abu dze yi ungwɔ mi itukwu ama nli mgbi Imgbasho ba, kpaa li mi ewe otseetse mgbi inggise.>>

³⁴ Man o kwu ibyi inggise ntona ela bɛyi emi ongwafɔɔn ba mbon si nya ma gbɛɛ: <<Ni i mina inggise o kyedo ani yɔ, o ka tangwe ewon dika kye ekwatsi mgban kyedo ani.

³⁵ Lubana ali inggise nmina odulu oshishe mgban tɔ yɔ, ka byulu lon, kpaa ali inggise nnu oshishe mgban byulu mi ikye ani yi Eso Osuse yɔ, ka dulu oshishe mgban tɔ.

³⁶ Li ali oyabo inggise ka tu kini a kye ese duu nun, kpaa oshishe mgban nyanya?

³⁷ Naadi li alungwɔ ngwi inggise ka kye nu ikye onyine yi oshishe mgban?

³⁸ Kini inggise kwayiwi ani yi eso mgbi ani mi ese amah yi eto ali ibwubwe nɛ yɔ, Ongwe Inggise kpaa ka kwayiwi otsungwɔn mi onɔ ngwi o ka ba mi okwɔkwɔ mgbi Otson yi engyeso ama osaan mani.>>

9

¹ Ta iYesu nya ma gbɛɛ, <<Ani nya ema otsitsi, inggise angbeka kwulese to mmenɛni a ka kwulu ba nghataa a ka di obaaba mgbi esuto mgbi Imgbasho yi mfyɛ.>>

Okwɔkwɔ mgbi iYesu

² Ngwi i wa nye egbe egyin nɛ, iYesu kyelu iPyita, iJensi yi iJɔn wafɔ yan kye ma tɔke lu

unggwɔ mi esho, ka to ele yuoma. Mi imbe na odzɛɛdze mgban kyata mi inai ma.

³ Angwuto mgban kyata tundzɛ kpledede, i tundzɛ ngha ngwi inggise ka kye enotse san no dzɛ ngha gbɛ.

⁴ Ta Elaija yi iMose wa mblegba tu ma, sile kponya yi iYesu.

⁵ IPyita gbɔ yi iYesu gbɛɛ, <<Otsetse, i tishi ni eyi to mmeneni. Ni eyi klɛ afu nghi eta, onyi ikye abu, onyi ikye iMose, oka ikye Elaija.>>

⁶ (O ye odzɛ ngwi o ka gbɔ ba, ikyena imio wo ma kpakpa.)

⁷ Ta akpa tɔ mi esho wa gbiiwulu tukwu ma, ela si tɔ mi iwulu na gbɛɛ: <<Nɛnɛ li Ongwani itukwu-itukwu. Gado mbon na!>>

⁸ Labɔlabɔ mata a ndinɛ kpatɛ, kpaa a di inggise onyi yi ama wuba se li iYesu yuon.

⁹ Dafi a le tashulu mi unggwɔ luba esɛ nɛ, iYesu wo ma ola gbɛɛ nu ma ka nya inggise onyi ungwɔ ngwi a di nɛ ba nghataa se ni Ongwɛ Inggise wa kyɛɛ mi ikwu.

¹⁰ A kye odzɛ nɛ da mi itukwu mgbi ama, a yɛ le kponya ungwɔ ngwi <<okyɛɛ mi ikwu>> tso mani.

¹¹ Ta a byun gbɛɛ, <<Kypsine ngwi etsetse mgbi ola mgbi iMose gbɔgbɛɛ Elaija ka teyi iKrestu ba?>>

¹² IYesu nu ma uka gbɛɛ, <<Mi otsitsi, Elaija teyi ba, wa yile alungwɔ duu mɛ le fɛ-fɛ. Kpaa li Afɛ ma kpɔɔ di teyi lɔ gbɛɛ Ongwɛ Inggise ka gyadze kpakpa a dika fwan baa?

¹³ Nghaduu ani le nya ema, Elaija teyi ba wa, kpaa a kyo yan dafi a mina, yeyɛ dafi Afɛ lɔ ikyon mani.>>

*IYesu dulu onodzi obube to
mbi ongwongyulo*

¹⁴ Ngwi iYesu yi engwafɔɔn eta ntona ye wa tu angbeka ntona ne, a di ibyi inggise kpakeke wo ma beyi etsetse mgbi ola mgbi iMose tole tangwodze yi ama.

¹⁵ Ngwi ine mgbi inggise ntona gbo yi iYesu ne, i kwulu ma ewo man a tsinya ke mbon ka tan angba.

¹⁶ IYesu byi emi ongwafɔɔn gbɛɛ, <<Li alungwo ngwi ema le tangwe yi ama mi ele?>>

¹⁷ Ongyulo oka mi ibyi na nun uka gbɛɛ, <<Otsetse, ani kye ongwani ongyulo ba mbi abu, o dze yi onodzi obube li non gbɔdze gbɛ ba.

¹⁸ Alonɔ ngwi i dzesin duu, li kyon ngwuta lake ese. O li mbwuuvu ondu, le gyaaba, di li ngwafwa kpɔklɔɔ. Ani nya engwafɔ abu gbɛɛ nu ma lo onodzi na to, kpaa a yagba ba.>>

¹⁹ IYesu gbɛɛ, <<Kpei, ema eto ama onoyeye ba ntonɛ, ani ka dze yi ema onɔ ka tunto sine? Ani ka shitukwu yi ema onɔ ka tunto sine? Kye ongwe ma ba mbi ani.>>

²⁰ A si kyon ba mbon. Ngwi onodzi na di iYesu labolabo mata, o kye ongwe na gyese le kwɔɔkwɔ. O gbese lake ese dile myini kpatse, le tsuuvu ondu.

²¹ IYesu byi otsongwe na gbɛɛ, <<I kye onɔ sine ngwi o dze ngha?>>

O gbɛɛ, <<Kye ese mgban.

²² Li kyon ngwuta woke ola naadi eni ikye ongwɔn. Nghane ni abu ka yagba kyungwo mi ele yo, di eyi elela ya eyi abɔ.>>

²³ IYesu gbɛɛ, <<Li ungwɔ ogbɛɛ kini abu yagbaa? Alungwɔ duu ka yagba kyɔ kyemɛ mbi inggise nnoyeyɛ.>>

²⁴ Labɔlabɔ nɛ otsongwɛ na kweela gbɛɛ, <<Ani noyeyɛ; tobyi ani ni ani kekiiyayi mi oyeyɛ onu-unu.>>

²⁵ Ngwi iYesu di gbɛɛ ibyi inggise tsinya le wa di nɛ, o fwa yi onodzi obube na gbɛɛ, <<Abu onodzi okyadɔ beyi ikplima nɛ, ani wo abu ola, tase mbon dika ye kaka mbon wuba.>>

²⁶ Onodzi na teela di nu ongwe na tsa si to dzanta. Ongwe na lake dafi inggise ikwukwɔ man ali inggise duu gbɛɛ, <<O kwulu.>>

²⁷ Nghaduu iYesu byin abɔ kyilen esho ta o si dzɛkunto.

²⁸ Onɔ ngwi iYesu wa kaka ifoozu nɛ, engwafɔn byin ita daada gbɛɛ, <<Kycsinɛɛ ngwi eyi yagba lon to ba?>>

²⁹ O nya ma gbɛɛ, <<Itɔ nɛ ka to mi ibɔ kyoon ta!>>*

IYesu di gbɔdze mi ikye ikwu ewon

³⁰ A lu dzata imbe nani, nye ifu iGalalia. IYesu mina gbɛɛ ni inggise onyi kpaa ye imbe ngwi ama to ba,

³¹ ikyekye o le tso engwafɔ mgban gbɛɛ, <<A ka wa kye Ongwe Inggise gya mi abɔ inggise. A ka ngwɔn, ni i wa nye egbe eta ta o ka kyɛɛ mi ikwu.>>

³² Nghaduu a difwi owitukwu mgban ba, i di wo ma imio obyun ita mi ele.

Li emɛ shewo ngha?

* **9:29 9:29** Olɔɔlɔ angbeka gbɛɛ li mi ibɔ yi ondu otukwu-tukwu.

³³ A ba iKapenahun. Ono ngwi o wodze ozu ne, o byi ma gbɛɛ, <<Li alungwo ngwi ema le tangwe ikyen mi ofe?>>

³⁴ Kpaa a kwondu ba ikyekye mi ofe ma a teyi tangwodze gbɛɛ li eme shewo ngha.

³⁵ IYesu si sɔke ese, kwu iwyodefa ntona ela nya ma gbɛɛ, <<Kini inggise mina oli ababo yo, li kyeme o ka li olele dika li ongbido mgbi angbeka duu.>>

³⁶ O nu ongwɛ ongbungbe wa kwudzekɛ idzidze mgbi ama. O kye abo don alubo, si nya ma gbɛɛ,

³⁷ <<Inggise ta ngbe onyi mi idzidze engbe ntonɛ mi iyi mgbi ani yo, o gbe ani; ma inggise ta ngbe ani yo, gbe ani ta ba kpaa li ongwu ndo ani eso mani.>>

Inggise nkyili eyi ba duu li emideyi

³⁸ IJon gbɛɛ, <<Otsetse, eyi di inggise oka le lo onodzi emese onya to mi iyi mgbi abu kpaa eyi nyan gbɛɛ non nya, ikyekye o li onyi mbi eyi ba.>>

³⁹ Ne iYesu gbɛɛ, <<Ka non nya ba, inggise onyi nkyungwo okwulewo mi iyi mgbi ani se ka ye kyata gbodze oka obube ikpewo ani dzema ba,

⁴⁰ lubana ali inggise nkye iga fyi yi eyi bayo dze yi eyi.

⁴¹ N nya ema otsitsi, inggise ta nnu abu eni mi ibwe mi iyi mgbi ani ikyegbɛɛ ema li emi iKrestu yo, li kyeme-kyeme umba mgban ka nyan ba.

Onu inggise gbese mi obube

⁴² <<Ma kini inggise onyi nu onyi mi ito engbe ama oshilele ama nnoyeye mbi ani ntonɛ gbese mi alobube yo, ka tatase lon nu ma kye onikwo shan onbukwo kyon ngwuta woke ekyoo okwukwo.

⁴³ Kini abo mgbi abu onyi li nu abu le gbese mi alobube yo, kye dzelu ngwuta. I tatase ni abu kaka oshishe yi mmya ngha onu abu kaka udola yi abo efa.

⁴⁴ (Imbe ngwi awi mgbi ama li kwulu ba, ngwi ola na kpaa li gye myunu ba nani.)[†]

⁴⁵ Ma kini afo mgbi abu onyi nu abu gbese mi alobube yo, kye dzelu ngwuta. I tatase ni abu kaka oshishe yi afo onyi odzedze ngha ngwi abu ka dze yi afo efa nu ma di kye abu ngwuta woke udola mani.

⁴⁶ (Imbe ngwi awi mgbi ama li kwulu ba, ngwi ola na kpaa li gye myunu ba nani.)[‡]

⁴⁷ Ma kini ine mgbi abu li nu abu le gbese mi alobube yo, kye todulu ngwuta. I tatase ni abu kaka esuto mgbi Imgbasho yi ine onyi ngha odze yi ine efa nu ma kye abu ngwuta woke udola,

⁴⁸ imbe ngwi
<< awi mgbi ama li kwulu ba,
ngwi ola na kpaa li gye myunu ba nani.>

⁴⁹ Ama nkyedo ani duu ka nye mi iso dafi inggise li kye mmwaa dzi ungow ofife mgbi ama se kye toola mani.

⁵⁰ <<Mmwaa tishi, nghaduu ni mmwaa dze yi mfya wuba, ema ka kycsinese non ye dze yi mfya? Fyumfya dafi mmwaa yi ewema, di dze mi iyu yi ewema na.>>

10

IYesu tsungwo mi odze eba oghaagha

[†] 9:44 9:44 Ambulu ne dze mi ololo angbeka ba. [‡] 9:46 9:46 Ambulu ne kpaa dze mi ololo angbeka ba.

¹ Neta iYesu si lu dzata imbe na ka kaka ayese iJudia di fa ekyoo iJodan. Ibyi inggise di ba mbon, ta dafi o teyi li kyo mani, o tso ma.

² Emi iFarasi angbeka ba wa mbadin yi ita gbɛɛ, <<Li ola ni ongyulo gheeba yi owaan?>>

³ IYesu byi ma gbɛɛ, <<iMose wo ema ola sine?>>

⁴ A gbɔgbɛɛ, <<iMose gbela gbɛɛ ni ongyulo dze afe ogheeba duuse lo ongyaa onya lu.>>

⁵ IYesu si nya ma gbɛɛ, <<IMose wo ema ola ne ikyekye ema fyumfye nu ma tso ema ungwɔ.

⁶ Kpaa mi owita-wita mgbi ese ma Imgbasho <Me ongyulo yi ongyaa kyoona.>

⁷ <Ikyenghane ongyulo ka dzata otsɔn yi onɔn yido kwokyi yi owan,

⁸ ta ama efa ka ye ikpewo onyi.> Hinine a yama li ikpewo efa wuba, kpaa a ye ewo onyi.

⁹ Nghanɛ ungwɔ ngwi Imgbasho kye kwokyi yi eka yo, ni inggise ka gha ma ba.>>

¹⁰ Ngwi a yido lu ozu ne, emi ongwafɔ iYesu byun ita mi ikye ungwɔnɛni.

¹¹ O nu uka gbɛɛ, <<Ali ongyulo ngheeba yi owan ye lu ka kye ongyaa oka yo, le kyo amah biyan.

¹² Ma kini ongyaa to mi ude oban ye lu ka bongyulo oka yo, o kyo amah.>>

Engbe ama ogyengye yi iYesu

¹³ Ibyi inggise gbe engbe ama ogyengye le ba mbi iYesu onon kye abɔ gbo ma ewo, nghaduu engwafɔn fwa yi ama.

¹⁴ Ngwi iYesu di ungwɔne ne, o kyitingga. O nya ma gbɛɛ, <<Dzata engbe ama oshilele nu ma ba

mbi ani, ka yama kwɔ ma ba, bana esuto mgbi Imgbasho dze mi ikye ama ntonɛ sini.

¹⁵ N nya ema otsitsi, ali inggise nka gbɛ esuto mgbi Imgbasho dafi ongwɛ ogyengye bayɔ, ka yagba kaka ele ba.>>

¹⁶ Nɛ o si kyelu engbɛ ama ogyengye ntonɛ byikɛ abɔ mgban, kye abɔ dɔ ma kye mse bɛ ma ewo.

Mmafa inggise awuya

¹⁷ Dafi iYesu kye ofɛ dikye le lu nɛ, ongyulɔ oka tsinya kɛ mbon ka kye akwafɔ kwoke esɛ mi iyayin. O byita gbɛɛ, <<Otsetse osuse, li ekyɛ ngwi ani ka kyɔ kyɛmɛ-kyɛmɛ otu oshishe igyegwu?>>

¹⁸ IYesu nyan gbɛɛ, <<Kyɔsinɛ ngwi abu kwu ani di osuse? Inggise onyi yama li osuse ba sede li Imgbasho yuon ta.

¹⁹ Abu ye ola: <Ka ngwɔ inggise ba, gbaamah ba, ka yimi ba, ka yama kyɔ obwendɛ atsika ba, ka kyɔ inggise ogye ba, sunu otsabu yi onabu.> >>

²⁰ O nya iYesu gbɛɛ, <<Otsetse, ungwɔ ntonɛ duu ani kyɔ ma nyɛ ngwi ani ka li ongbɛ mani.>>

²¹ Ta iYesu din inɛ si dze yi okpitukwu mbon. O nyan gbɛɛ, <<Ungwɔ onyi sisi mbi abu, lu, ka kye alungwɔ ngwi abu dzɛyan duu gya kye awuya ma nu emi adzɛ, ta abu ka dze yi aludu mi esho. Taman yɛ, ba wa kyɛdɔ ani.>>

²² Mi elodze nɛ inɛ mgbi inggise na si kyata mi ikye yɛɛ tsikitsiki. O tase yi mtse lu, ikyena o dze yi aludu shewo kpakpa.

²³ Nɛ iYesu si kyata inɛ kyidi nya emi ongwafɔɔn gbɛɛ, <<Ka fyumfye kpakpa ni inggise aludu kaka esuto mgbi Imgbasho!>>

24 I kwulu engwafɔɔn ewo mi elodze mgban. Kpaa iYesu di yile odze ne gbɔ gbɛɛ, <<Engbe, dafi i suno okaka esuto mgbi Imgbasho maa!

25 Ka nghao suno ba onu ilakwumyi kaka ifo edi fato ngha onu inggise udza kaka esuto mgbi Imgbasho.>>

26 Ne i nghao kwulu emi ongwafɔɔn ewo, ta a gbɔ yi ewoma gbɛɛ, <<Nghama li eme tsatso ka wato?>>

27 IYesu di ma ine si gbɛɛ, <<Mbi inggise yo ungwo ka yagba dze ngha gbe ba, nghaduu mbi Imgbasho yo ka yagba dze ngha; bana mbi Imgbasho yo alungwo duu dze kyeme-kyeme.>>

28 IPyita si nyan gbɛɛ, <<Eyi dzata alungwo duu kyedo abu!>>

29 IYesu nu uka gbɛɛ, <<N nya ema otsitsi, inggise onyi ngwu dzata ude naadi emi ongwunon engyulo yi engyaa naadi onon yi otsɔn hona engbe naadi okwo mi ikye ani beyi Eso Osuse yo,

30 ka yama ndan owa yido tuun mi ono ngwi eyi wodze ele ne beyi ono ongwi iyayi ba.

31 Nghaduu emi ababo gwuba ka wa yee emi olele, emi olele dika yee emi ababo.>>

IYesu di gbɔdze ikwu ewon

32 A kye ofe dikye le lu iJerosalin, iYesu teyi ofe, man i kwulu emi ongwafɔɔn ewo, ama nkye ma iyikpa kpaa imio wo ma. Ta o di gbleke enggenga yi emi iwyodefa ntona nya ma ungwo nka wa kyo ngwu mani.

33 O gbɔgbɛɛ, <<Eyi le lu iJerosalin, ne a ka kye Ongwe Inggise wo engyukwo ama ofife yi etsetse

mgbi ola abo. A ka ngwɔn ikwɔ ikwongye di kyon wo Udzengye abo,

³⁴ a ka nyan agya di kyanggwa kyin ye gbon ibe di ngwɔn. Ni i wa mɛ egbe eta, o ka kyato mi ikwu.>>

Ibo mgbi ijensi beyi ijɔn

³⁵ Ta ijensi yi ijɔn, emi ongwe iDzebedi, ka ba mbi iYesu. A nyan gbɛɛ, <<Otsetse, eyi mina gbɛɛ abu ki kyo eyi alungwa ngwi eyi mina duu.>>

³⁶ IYesu byita gbɛɛ, <<Li ekye ngwi ema mina gbɛɛ ni ani kyo ema ele?>>

³⁷ A gbɛɛ, <<Ni onyi mbi eyi so abugye mgbi abu oka mi abube mi okwɔkwɔ mgbi abu.>>

³⁸ Nɛ iYesu gbɛɛ, <<Ema yama ye ungwa ngwi ema tole mina na ba. Ema ka yagba wa mi ibwe ngwi ani ka wa naadi kyo iBatisima ngwi a kyo ani ma gbɛɛ?>>

³⁹ A nu uka gbɛɛ, <<Eyi ka yagba.>> Man iYesu si nya ma gbɛɛ, <<Ema ka wa mi ibwe ngwi ani wa di kyo iBatisima ngwi ani kyo mani,

⁴⁰ nghaduu oso abugye hona abube mgbi ani yama li ani ka nu ofɛ ba. Imbe ntonɛ dze mi ikye mgbi ama a kye dze ma mani.>>

⁴¹ Ngwi iwyo ntona fwo ungwɔnɛ nɛ, itingga kyo ma kpakpa yi ijensi beyi ijɔn.

⁴² Man iYesu si kwu ma ela kwakye gbɔgbɛɛ, <<Ema ye ama ngwu a di gbɛɛ a mɛ ogbe Udzengye teyi li kyo mfyɛ mboma, engyukwo ama oshewo mi idzidze ma li kyo mfyɛ ikpewo ma.

⁴³ Mbi ema yama li ngha ba. Kini inggise onyi mbi ema mina oyee ongbodzi inggise ya, li kyeme-kyeme no yee ongbido mgbi angbeka,

⁴⁴ ma ali inggise nmina oli ongwi ababo ya, li kyeme-kyeme no yee ofyee mgbi ema duu.

⁴⁵ Bana Ongwe Inggise abuan ba ikyegbee nu ma wa kyon ido ba, kpaa owa kyockyido, odi kye oshishe mgban nu ikye onagbe ibyi inggise.>>

IYesu kwulu iBatimayo ine

⁴⁶ Ne a si luba iJeriko. Dafi iYesu yi engwafoon yi ibyi inggise wafu ungwonyi le tase dzata igeli ne, inggise obine ngwu a li kwun di iBatimayo (itan di, Ongwe iTimayo), sodze ewo ofe le bibo.

⁴⁷ Ngwi o fwo gbee li iYesu ongwi iNadzareti ne, o wita okweela gbee, <<i>Yesu, Ongwe iDevedi, di ani elela!>>

⁴⁸ Ibyi inggise kwon di nyan gbee non yile ondu tukwu shili-shili, kpaa o kweela nghaabo ogbugbe gbee, <<Ongwe iDevedi, di ani elela!>>

⁴⁹ Ta iYesu si kwulesa gbogbee, <<Kwun ela na.>> A si kwu obine na ela gbee, <<Dze yi atsa! Kyato nto! O le kwu abu ela.>>

⁵⁰ O si gbe angwuto mgban ngwuta mi agya oka, kyato vla ke mbi iYesu.

⁵¹ Ne iYesu byun gbee, <<Li alungwo ngwi abu mina gbee ni ani kyoo abu ele?>>

Inggise obine na gbee, <<Otsetse, ani mina gbee n ki dine.>>

⁵² Ta iYesu gbee, <<Lu, oyeye onuunu mgbi abu ngyelu abu ootse.>> Vla-vla ma jo ine mgban kwulu o di diye kyedo iYesu mi ofe le lu.

11

IYesu kaka iJerosalin mi onghaangha

¹ Dafi a dze kwekwe okaka iJerosalin di ba iBetifege beyi iBetani mi Unggwɔ Olivi nɛ, iYesu dɔ engwafɔɔn efa esɔ,

² o gbɔ yi ama gbɛɛ, <<Kɛ agwɔ ndzɛ ema iyayi nani, ni ema kaka ele yɔ, ema ka di ongwɛ itaklimyi shadzɛ ele, ngwi inggise onyi tɔɔn ye waba. Shan kye ba mmenɛni.

³ Kini inggise byi ema gbɛɛ, <Kyɔsine ngwi ema le kyungwɔnɛ ngha yɔ?> Nyan gbɛɛ, <Odzɛ wo Otɛ iYesu mi ele o ka wa yilen mi onɔ gwee.> >>

⁴ Ta a si kɛ ka tu ongwɛ itaklimyi shadzɛ onufɛ kye ine byi ofɛ. Dafi a le shan nɛta,

⁵ inggise angbeka nkwulɛɛ to imbe na byi ma gbɛɛ, <<Li alungwɔ ngwi ema le kyɔ, ema le shɛ ongwɛ itaklimyi nɛɛ?>>

⁶ Nɛ a nu uka dafi iYesu tsekise nya ma mani, man inggise ntona si dzamata nu ma kye lu.

⁷ Ngwi a kye ongwɛ itaklimyi ma ba mbi iYesu nɛ, a kye angwuto mgbi ama tukwun ekpo man iYesu tɔɔkɛ ele.

⁸ Ibyi inggise gbe angwuto mgbi ama tase mi ofɛ, angbeka dze afɛ otse mi ondu okwɔ ngwuta tokɛ esɛ mi ofɛ.

⁹ Ama nteyi tole kiyayi yi ama nkyɛɔ ma ma, kweela gbɛɛ,

<<Osana!*

Mse no dze yi ongwu nba

mi iyi mgbi Otɛ Imgbasho nɛni!>>

* **11:9 11:9** Osana li iyi mi ondu iHibru itan di Nagbɛ! I yɛɛ iyi ungwɔ otɛɛtɛ

10 <<Mse no dze yi
esuto mgbi otseyi iDevedi nka ba nani!
Osana mi onghaangha!>>

11 Ne iYesu wa kaka iJerosalin si lu mi ozu okwukwo osunu Imgbasho mi iJerosalin nani. O kyidi alungwo tsatsadu, nghaduu ngwi onɔ gbese wa ne, o tase lu iBetani yi iwyodefa ntonani.

*IYesu lo inggise onya
to mi ozu okwukwo osunu Imgbasho
mi iJerosalin*

12 Tegblifan dafi a le dzata ogalu mgbi iBetani ne, enbwa do iYesu.

13 O di andundu kwo mbombo yi afe mi efu yugu-yugu, o si ke oka kyidi kaba awawa to ele. Ngwi o ka to itan ne, o yama tu unkonyi ba se afe ta, ikyena li onɔ mgban owa owawa ba.

14 O si nya ekwo na gbese, <<Inggise onyi ka yama tu awawa mbi abu gye wuba.>> Emi ong-wafɔɔn fwo dafi o gbo ngha mani.

15 Ngwi a kaka iJerosalin ne, iYesu kaka ozu okwukwo osunu Imgbasho mi iJerosalin na man wita olo ama nle kyummya beyi ama nle gya mi imbe na onya to. O tsamu adinyatse mgbi ama nle nyine udza beyi itse oso efu mgbi ama nle kye ingyakpa gya,

16 di nu inggise onyi ofe gbese non kyummya mi idzidze ozu okwukwo osunu Imgbasho na ba.

17 Man o si le tso ma ungow, o gbɔgbese, <<Afe lo gbese:

<< <A ka kwu ozu mgbi ani gbese
ozu ibo mgbi ese duu baa>?

Nghaduu ema kyatan yɛɛ <imbe mgbi emumyi ama oblofɛ.> >>

¹⁸ Ngwi engyukwo ama ofifɛ bɛyi etsetse mgbi ola fwo ungwɔnɛ nɛta a si wita opita ofɛ ngwi a ka ngwɔn, bana a mion, ikyekyɛ le kwulu inggisɛ duu ewo mi otsootso mgban.

¹⁹ Ngwi onɔ gbɛɛ nɛ, a tɔ dzata ogalu.

Andundu ongwɔngwɔ

²⁰ Mi egbegbe, ngwi a le lu nɛ, a di andundu na ngwɔ wita kyɛ akpa lu ikyen.

²¹ Ta iPyita wɛ di nya iYesu gbɛɛ, <<Otsetse, dii! Ekwɔ andundu ngwi abu won ikamba nɛ ngwɔ!>>

²² IYesu si nyan gbɛɛ, <<Dzɛ yi oyɛyɛ onuunu mbi Imgbasho.

²³ N nya ema otsitsi, yeba ni inggisɛ nya unggwɔ nɛ gbɛɛ, <Lu, kye ewabu ka ngwuta mi ekyoo okwukwo,> di yama dzɛ yi angwɛ mi itukwu ba di noyɛyɛ gbɛɛ ungwɔ ngwi ongwu gbo na ka kyo ngha yɔ, a ka kyɔn ele.

²⁴ Nghanɛ n nya ema, alungwɔ ngwi ema bo mi ibo yɔ, noyɛyɛ gbɛɛ ema tun wa, ta dika li mgbi ema.

²⁵ Mi onɔ ngwi ema kwulesɛ le bibo yɔ, dzata angbeka ama nkɔɔ ema obube. Ta Otsema ndzɛ esho na ka dzita ema yi ali ibwubwe mgbi ema.>>

[

²⁶ kpaa ni abu dzata inggisɛ yi obube bayɔ, Otsabu ndzɛ esho kpaa ka dzita abu yi obube mgbi abu ba.]†

Ita mi odzɛ mfye mgbi iYesu

† 11:26 11:26 Ambulu nɛ dzɛ mi olɔɔɔ angbeka ba.

27 A di ba wa kaka iJerosalin, ta ngwi iYesu le kyikye kye mi aye ozu okwukwo osunu Imgbasho ne, engyukwo ama ofife yi etsetse mgbi ola beyi engyukwo emi iJuda ba mbon.

28 A byita gbɛɛ, <<Li mi ali mfye ngwi abu le kyungwo ntonɛ? Di li emɛ nu abu mfye okyungwo ntonɛ?>>

29 Ne iYesu si gbɛɛ, <<Ani kpaa ka byi ema ita onyi ta. Nu ani uka na, ta n ka nya ema imbe ngwi ani tu mfye le kyungwo ntoneni.

30 Nyen na, iBatisima mgbi iJon ne tokye mi esho naadi mbi inggise?>>

31 A si gbo yi ewoma gbɛɛ, <<Kini eyi gbɛɛ, <Kye mi esho,> o ka byita gbɛɛ, <Ma kyɔsine ngwi ema nun oyeyɛ ba?>

32 Kpaa ni eyi gbɛɛ, <Kye mbi inggise yɔ>....>> (A tsimio ibyi inggise, bana ali inggise ye jo gbɛɛ iJon li oyegbo.)

33 Ne a nu iYesu uka gbɛɛ, <<Eyi ye imbe ngwi i tokye ba.>>

Man iYesu gbogbɛɛ, <<Ngyese ani kpaa ka nya ema ito mfye ngwi ani le kyungwo ntonɛ ba.>>

12

*Utsa mgbi emi ibwubwe ngwu
a kye okwo wo ma abo*

1 O si wita ogbodze yi ama mi utsa gbɛɛ: <<Inggise shi okwo awawekwo*. O mbe ogalu kpakeke won, di tishɛ ogbe eni owawa ekwo di tuo otila

* 12:1 12:1 Ekwo ne li wa owawa ngwi emi Israi nose li kye me ungwo owawa yan.

ikye ongyo. Ta o kye okwo na wo emi okwo angbeka abo si lu agaba.

² Mi onɔ oshɛ etɔ mani, o dɔ ongbidɔ mgban esɔ mbi ama ngwu o kye okwo wo ma abɔ ma gbɛ non ka gbɛ owawa ekwo ongyi okwo na mboma.

³ Kpaa a kpaklin, gbon lon onya lu abubu.

⁴ Ta o di dɔ ongbidɔ oka esɔ mboma; a kye ungwɔ zudɔn ikye onun ayiwi.

⁵ Otsungwɔ okwo na diyɛ dɔ oka, ongwu na a kyon kye ngwɔlu. O di dɔ angbeka kwuba, angbeka ma, a gbo ma, angbeka yɔ, a ngwɔ ma.

⁶ <<Otsungwɔ okwo sisi yi inggise onyi ta odeso, ongwɔn ongwu ongyulu, ongwu nkpan itukwu saan. O dɔnsɔ olele gbɛ, <A ka nu ongwani mmwe.>

⁷ <<Nghaduu ama odi mi okwo ntona gbɔ yi eka gbɛ, <Nenɛ li ongwɛ nka gyokwudɛ ma aani. Ba na, ni eyi ngwɔlu, ta okwudɛ ka yɛ mgbi eyi.>

⁸ Nɛ a si kyon kye ngwɔlu, di kye ikwo mgban ngwi tase mi okwo.

⁹ <<Li alungwɔ ngwi otsungwɔ okwo na ka kyo? O ka ba wa ngwɔlu ama ngwu o kye okwo wo ma abɔ ntona di yile okwo nu angbeka.

¹⁰ Ema gbɔ Afɛ nɛ walo:

<< <Akwutɛ ngwi ama ombɛ ozu fwan ma i yɛ okwulu ikye ozu;

¹¹ li Otɛ Imgbasho kyungwɔnɛni, nekpaɛ li ungwɔ okwulewo mbi eyii>?>>

¹² Ta a pita ofɛ obwan ikyekye a ye dafi o gbɔ utsa na ikye mgbi ama. Nghaduu a le mio ibyi inggise; nɛ a si dzanta lu.

*Okpa udza ifyee nu iSidza
(Uto mgbi emi iRoma)*

¹³ A do emi iFarasi angbeka eso mi iyikpa yi emi iHerude mbi iYesu ikye oka bwan mi elodze mgban.

¹⁴ A ba mbon wa gbɛɛ, <<Otsetse, eyi ye abu li inggise otsitsi. Abu li mio inggise ba, ikyekye abu li kye oshewo nu inggise mi odzedze mgbi ama ba; kpaa abu li tso ofe mgbi Imgbasho imbison-mbison yi otsitsi. Ne li ola ni eyi kpa udza ifyee nu iSidza naadi li ola ba?

¹⁵ Ni eyi kpa naadi ni eyi ka kpa ba?>>

Nghaduu iYesu ye ewe mgbi ama, o nu ma uka gbɛɛ, <<Kyonɛ ngwi ema le mina okya ani ukya? Kye isule ma wa nin di.>>

¹⁶ A kye isule ma ba, man o byi ma gbɛɛ, <<Nene li onodzi mgbi eme dode ele? Di li ololo mgbi eme?>>

A gbɛɛ, <<Li mgbi iSidza.>>

¹⁷ IYesu si nya ma gbɛɛ, <<Kye ungwɔ mgbi iSidza nu iSidza di kye mgbi Imgbasho nu Imgbasho.>>

Man i kwulu ma ewo biyan.

Eba mi onɔ okyee mi ikwu

¹⁸ Nghane emi iSadusi, ama ngbɛɛ okyee-kyee mi ikwu dzema ba ma, ba mbi iYesu yi ita.

¹⁹ A gbɛɛ, <<Otsetse, iMose lo gbɛɛ ni ongwuno inggise kwulu dzata ongyaa kpaa mba engbe bayo, inggise na no yile owakwade na kyeme-kyeme di mba engbe mi ikye ongwuno ongwu nkwulu nani.

²⁰ Engwuneka nghi egyafa nose to. Ongwu ababo kye ongyaa kwulu dzata ongwɛ onyi ba.

²¹ Ongwu fan yile owakwade na, kpaa o di kwulu dzata ongwe onyi ba. Ongwu ta kpaa li ngha.

²² Mi otsitsi, onyonyi mbi engyulo egyafa nton dzata eto onyi ba. Ongyeengye duu, ongyaa na kpaa wa kwulu.

²³ Mi egbe ngwi inggise ka kye mi ikwu ma li eme ngwu ongyaa ne ka li owan, ngwi ama egyafa duu kyon?>>

²⁴ IYesu nu uka gbæ, <<Ema boofe ikyegbæ di ema ye ungwɔ ngwi Afe lo ba di ye mfyɛ mgbi Imgbasho kpaa ba.

²⁵ Bana mi onɔ ngwi inggise ka kye mi ikwu mani, a ka kye ongyaa hona kye ongwe nu eba wuba; a ka to dafi engyeso emi esho mani.

²⁶ Mi ikye odze okye mi ikwu ne, ema gbɔ mi Afe mgbi iMose, mi odze mgbi oshe na walo? Dafi Imgbasho nyan gbæ, <Ani li Imgbasho mgbi Abraham, Imgbasho mgbi Adziki di li Imgbasho mgbi iJeko ma baa>?

²⁷ O li Imgbasho mgbi emi ikwukwɔ ba, kpaa Imgbasho mgbi emi oshishe. Ema le boofe timbi saan!>>

Ola onghaangha

²⁸ Onyi mi etsetse mgbi ola mgbi iMose ba wa fwo ma le tangwodze. Dafi o di gbæ iYesu nu ma uka osuse neta, o si byun gbæ, <<Mi ola duu ma, li ole nghao wuuta?>>

²⁹ IYesu nu uka gbæ, <<Ongwu nng hao wuuta ma, li ongwu aani: <Fwo na, ema emi Israi, Otse Imgbasho mgbi eyi, Otse na li onyi.

³⁰ Otse Imgbasho mgbi abu no kpa abu itukwu yi itukwu mgbi abu duu yi oshishe mgbi abu duu beyi mfye mgbi abu duu.>

³¹ Ongwu fan yɔ: <Inggise nwatse dɔ abu no kpa abu itukwu dafi ewabu mani.> Ola oka dzema nshewo ngha ola ntonɛ ba.>>

³² Otsetse mgbi ola na nu iYesu uka gbɛɛ, <<Otsetse, abu gbɔ tishi. Abu li ayin ogbɔgbɛɛ Imgbasho li onyi oka dzema ba se ongwu ta mani.

³³ Onon kpa abu itukwu, yi itukwu mgbi abu duu yi oyeye mgbi abu duu beyi mfye mgbi abu duu, inggise ongwu nwatse dɔ abu no di kpa abu itukwu dafi ewabu na, li ungwɔ nwuuta ngha umba ama otoola beyi ama ofife duu.>>

³⁴ Ngwi iYesu di gbɛɛ o nu uka mi ozoyeye nɛ, o nyan gbɛɛ, <<Abu dze mbombo yi esuto mgbi Imgbasho ba.>> Ta mi onɔ na lu iyayi inggise onyi kpaa yagba byun ita angbeka wuba.

IKrestu nɛ li Ongwɛ emɛ?

³⁵ Ngwi iYesu le tso mi ozu okwukwo osunu Imgbasho mi iJerosalin nɛ, o si byita gbɛɛ, <<Kycsinɛse ngwi etsetse mgbi ola mgbi iMose gbɔgbɛɛ Ongwu Imgbasho zonu gbɛɛ o ka wa dulu ese watɔ (iKrestu) ma li Ongwɛ iDevedi?

³⁶ Onodzi Osaan kye iDevedi abuon kpaa teyi non gbɛɛ:

<< <Otse Imgbasho nya Otse mgbi ani gbɛɛ:

<<Sɔkɛ mi abugye mgbi ani

ngkataa ni ani wa nu engyikyili mgbi abu

yɛɛ itse mgbi abu ogbe afɔ dɔ efu.>> >

³⁷ IDevedi abuon kwun di <Otse.> Nghane ka kycsinɛse ngwi o ka li ongwɛn?>>

Ibyi inggise ntona fwo otsootso mgbi iYesu yi atsa mi itukwu mgbi ama.

IYesu kwo ado mi otsootso mgbi etsetse mgbi ola

³⁸ Mi otsootso mgbi iYesu ma, o gbɛɛ, <<Kye ine byi etsetse mgbi ola na. A li mina okyikye yi angwuto owulu-wulu nu ma dile ta ma angba mi ifyidu,

³⁹ odi so itse ngwi a nghao kye wuuta mi ozu okwakye mgbi emi iJuda yi imbe okpongɔ mi oga.

⁴⁰ A li gye mmgbɛ mi uɔɔ mgbi emi owakwade di li bibɔ tunto otso gbɛɛ ama tishi. Itɔ inggise ntona Imgbasho ka kwo ma ado she kpakpa.>>

Umba mgbi owakwade

⁴¹ Man iYesu sise mi agya imbe ngwi a gbe umba le woke, le di ibyi inggise kye udza mgbi ama le woke mi ashiko mgbi ozu okwukwo osunu Imgbasho mi iJerosalin. Ama odze yi udza kwuba kpaa kye udza mgbi ama le woke ele.

⁴² Nghaduu ongyaa owakwade adze ba wa nu anini efa, ngwi mɛ ikobo onyi ta.

⁴³ Ne iYesu si kwu engwafɔɔn ela ba mbon nya ma gbɛɛ, <<N nya ema otsitsi, ongyaa owakwade adze ne nghao kye woke mi ashiko ngha angbeka duu.

⁴⁴ Ama duu a nu mi odzɛɛdze mgbi aludu mgbi ama; kpaa owakwade ne yɔ, li mi adze mgban ngwi o nu, li ungwɔ ngwi o dze biyan duu onon dze oshishe mani.>>

13

Ambɛ mgbi ɛɛ ongyɛngye

¹ Dafi iYesu le tase mi ozu okwukwo osunu Imgbasho mi iJerosalin neta, onyi mbi engwafoon nyan gbɛɛ, <<Dii, Otsetse! Li ali ito akwutse osugbo-osugbo den! Li ali ito ozu ogbosine nghalo! >>

² IYesu nyan gbɛɛ, <<Abu di ozu ama oshewo ntonɛ wɛ? Ikwutse onyi mmene kpaa ka sisi do ikye oka ba; ali ikwutse duu a ka wa kye gbobu tukwu ese.>>

³ Ngwi iYesu sise mi Ungwo Olivi mi agya ozu okwukwo osunu Imgbasho mi iJerosalin nɛ, iPyita yi iJensi yi iJon beyi Andru byun daada gbɛɛ,

⁴ <<Nya eyi, li alono ngwi ungwɔ ntonɛ ka wa kyo? Dika li ali ambɛ ka tso gbɛɛ ungwɔ ntonɛ le ka mbwumbwo?>>

⁵ IYesu nya ma gbɛɛ: <<Gbɛwɛbyi na, ka nu inggise kpagya ema wo ba.

⁶ Inggise kwuba ka ba mi iyi mgbi ani, le gbat-sika gbɛɛ, <Li ani li iKrestu mani,> dika kpagya inggise wo kwuba.

⁷ Mi ono ngwi ema fwo ika beyi odze a gbɛɛ mgbi ika yo, ka teeyi ba na. Bana ungwɔ ntonɛ duu ka kyo kyeme-kyeme, kpaa li ongyeengye ese wa daaba.

⁸ Eɛ ka kyɛɛ ika beyi ɛɛ oka, esuto ka kyɛɛ ika beyi esuto oka. Eɛ osuusu ka dze mi imbe idzidza-dzidza, beyi enbwa. Ungwɔ ntonɛ li owita-wita mgbi iso.

⁹ <<Gbɛwɛbyi ewema kyeme-kyeme na. A ka kye ema nu mi abo okwakye mgbi ama ogbiikwo nu ma gbo ema ibe mi ozu okwakye mgbi emi iJuda. Mi ikye mgbi ani a ka kye ema ba ine emi iGona yi emi uto dafi obwende mboma.

10 Ma Eso Osuse ne a ka teyi gbon kyeme-kyeme mi ese duu.

11 Kini a bwa ema kye ba owa gbo ema ikwo ya, itukwu no ka teyi kaka ema ewo mi odze ngwi ema ka gbo ba. Nghaduu gbo ali odze ngwi a kye ba mbi ema mi ono na mani, bana li ema kale gbodze ba, elodze mgbi ema ka kye mbi Onodzi Osaan.

12 <<Inggise ka kye ongwunon nu ikwu, otsongwe kpaa ka kye onghan nu. Engbe ka ngha ama omba ma ado di nu ma kwikwu.

13 Inggise duu ka kyili ema mi ikye ani, ng-haduu inggise nkwulese kpoklo ba ongyeengye ka wato.

14 <<Mi ono ngwi ema di ungwao <idza nka nu odzili-dzili> kwulese dze imbe ngwi i wogyo gbee ki dze bayo, inggise nle gbo ungwao ololo ma no difwi, ne ama nto ifudia nu ma tsinya lu unggwo.

15 Ni inggise onyi ndodze ikyendu mgban ka tashulu ba ese naadi kaka ozu oka kye ungwao onyi tase ba.

16 Ni inggise onyi nkedze okwo kpaa ye ba ude owa gbe angwuto mgban ba.

17 Nghaduu odze ka tu engyaa ama nto yi ifewo yi ama nle nu engbe abe mi egbe ntonani!

18 Ema bibo gbee ungwone no ka kyo mi owa ba,

19 ikyekye egbe ntona ka li egbe adze ngwi Imgbasho ta ese jo ito adze na yama dze ngha ye ba, ma dika dze ngha ono onyi kpaa wuba.

20 Kini Otse Imgbasho kye mwalu egbe ntona bayo, inggise onyi kika wato ba. Kpaa mi ikye ama ngwu o sadu mayo, o kye mwalu egbe nani.

²¹ Mi onɔ na kini inggise nya ema gbɛɛ, <Dii, Ongwu Imgbasho zonu gbɛɛ o ka dula ɛɛ wato ma (iKrestu) dzana!> Hona, <Dii, o dze aali!> Ka noyɛɛ mi ele ba.

²² Bana emi iKrestu atsika beyi oyegbo emi atsika ka tole kyɔ ambe beyi ungwɔ ama okwukwo ikye okpaga ama a sadu ma ma wo, ki no li kyeme-kyeme yɔ.

²³ Nghane gbewɛbyi ewema na; ani teyi nya ema alungwɔ duuse ni onɔ na wa gyɔ.

²⁴ <<Nghaduu ni adze na wa nye mata,
<< onɔ ka yifu,
ofya dika tso osa mgban wuba;

²⁵ mɛɛ ka yangwuta mi esho,
Imgbasho ka kyɔ mfyɛ,
alungwɔ mi esho duu ka suusu.>

²⁶ <<Mi onɔ na inggise ka di Ongwe Inggise kye akpa mi esho yi mfyɛ okwulewo beyi okwɔkwɔ.

²⁷ Ta o ka do engyeso mgban eso mi ayɛɛ ene wa gbe ama ngwu o sadu mi odonu mgbi ɛɛ nghataa lu mi odonu mgbi esho ma duu kwakye mbonyi.

²⁸ <<Ikyenghane kpayi ozoyeye ne mbi ekwo andunu na: Ni abɔn kyinda di baafe mata, ema li ye dafi li akyonova mani.

²⁹ Nghaduukpaa, ni ema di ungwɔ ntonɛ le kyɔ yɔ, ye na gbɛɛ dze kwɛkwɛ, jo okaka onufu.

³⁰ N le nya ema otsitsi, ungwɔ ntonɛ duu ka kyɔ se ɛɛ ne ka ngyɛ.

³¹ Esho yi ɛɛ ka nye, kpaa elodze mgbi ani ka yagba nye ba.

Inggise ye egbe hona onɔ ma ba

³² <<Inggise onyi ye egbe hona onɔ ma ba, engyeso emi esho kpaa ye ba, naadi Ongwe, kpaa li Otse Imgbasho yuon ye.

³³ Kwasisa di ngyo na! Bana ema ye egbe ngwi onɔ na ka ba ba.

³⁴ Dze dafi inggise le lu agaba: O dzata ude di gbe engbido mgban toke mi ungwɔ mgban duu, ali inggise mgbi ama yɔ o nun ido mgban, di nya ongwu ndze onufozu ma gbɛɛ non ngyo.

³⁵ <<Nghanɛ le ngyo na bana ema ye onɔ ngwi otsungwude na ka ye ba, kyayina ka li mi onɔde, naadi ka li mi idzidze otu, hona mi onɔ ngwi ogbigbi ka teela, naadi ka li mi ikyegbe ho.

³⁶ Ki non ye bwabwa kpaa, no ka tu ema le nuna ba.

³⁷ Ungwɔ ngwi ani le nya ema nɛ, n le nya ali inggise duu gbɛɛ: <Ngyo na!> >>

14

A kye engyie kyi iYesu ikye mi iBetani

¹ I sisi mɛ egbe efa ngwi oga owe owato-wato mgbi emi Israi beyi ibredi ngwi a kye okwuna wo efu ba ka wa gyo neta, engyukwo ama ofife beyi etsetse mgbi ola mgbi iMose tole pita ofe mi oshu ngwi ama ka bwa iYesu di ngwon mani.

² A gbɔgbɛɛ, <<Kpaa no ka li mi egbe oga ba, bana inggise ka ndeye.>>

³ Mi onɔ ngwi iYesu dze iBetani mani, o sise ogye ungwogyɛ mi ude inggise ongwu a li kwun

di iSaimon inggise otsoma, ongyaa ba yi engyie ofyunfyummya mi ikpokpo alabasta*, engyie mgbi ekwo iNadi† yuon. O kye ikpokpo alabasta na ondun kye kwulu, kye engyie ma yawo iYesu ikye.

⁴ Ama nto mi ono na ma, tole gbo mi itingga-itingga yi ewoma gbɛɛ, <<Nene li engyie ombeembe den lo?

⁵ A ki kye gya me udza nngba udza ido onova onyi di kye udza ma gha emi adze.>> A si kyokyo yi ongyaa na mi itingga-itingga.

⁶ Nghaduu iYesu gbɛɛ, <<Ema dzanta na. Kyone ngwi ema le kakan ewo ngba? O kyungwo nli osuse yi ani.

⁷ Bana emi adze to yi ema alono duu, ema ka ya ma abo alono ngwi ema mina duu. Kpaa ani yo, ema ka tu ani alono ba.

⁸ O kyungwo ngwi o yagba okyo. O kyi ani engyie mi ewo duuse ni ono ondzi ani wa gyo.

⁹ N nya ema otsitsi, mi ali imbe ngwi a le gbo Eso Osuse kpatse ese duu, ungwo ngwi o kyo ne a ka gbɔn, ikye ole wan.>>

¹⁰ Ta iJuda iSkaroti, ongwu nli onyi mbi emi iwyodefa ntona, ke mbi engyukwo ama ofife oka kye iYesu gya yi ama.

¹¹ I kpa ma ofwo odze neni a di zonu onun awuya. Nghanɛ o pita ofe okyon wo ma abo.

*Ungwogyɛ mgbi Otse iYesu
ongwi olɛɛ.*

* **14:3 14:3** Alabasta na li ongwɛ ishe ngwi a li man tishi ine saan mi ikwutse ngwi a li kwu di alabasta mi ondudze mgbi ama
† **14:3 14:3** Ekwo iNadi li ekwo ndze ese iDia ngwi a li kye kyo engyie ogbungbe yan.

¹² Mi egbe ongwi ababọ mgbi oga ibredi ngwi a kye okwuna wo efu ba, ngwi li ungwọ eto mgbi ama ofife yi mmala oga owe owato-wato mgbi emi Israi nẹ, engwafọ mgbi iYesu byun gbẹẹ, <<Li mi ole ngwi abu mina ni eyi kẹ ka melu abu imbe ogye oga owe owato-wato mgbi emi Israi nẹ?>>

¹³ Neta o dọ engwafọn efa esọ, nya ma gbẹẹ, <<Kaka ifu igeli na, ongyulo kye ishe eni dikye ka wa kpatse ema. Kyedon na.

¹⁴ Imbe ngwi o kaka ma, nya otsungwude ma gbẹẹ, <Otsetse byita gbẹẹ: Ozu ingyoga mgbi ani, ngwi ani ka gye oga owe owato-wato mgbi emi Israi yi emi ongwafọ mgbi ani ma kọ?>

¹⁵ Ta o ka tso ema ozu okwukwo mi ozeesho, ngwi a gbe okye to ele le fẹfẹ. Kye melu mi ikye eweyi na.>>

¹⁶ Emi ongwafọ ntona si lu ifu igeli ka di ungwọ ntona yeye dafi iYesu nya ma mani. Nẹ a kye kyolu ungwogye oga owe owato-wato mgbi emi Israi.

¹⁷ Ono wa gbese neta, iYesu wa kaka beyi emi iwyodefa ntonani.

¹⁸ Ngwi a sise kwongongo le gye ungwogye mi adinyatse neta, o gbogbẹẹ, <<Ani le nya ema otsitsi, onyi mbi ema ka kye ani gya, o so le gye ungwogye yi ani mmene kpaa.>>

¹⁹ A si yee elela dile byun onyonyi gbẹẹ, <<Li ani ba lọ?>>

²⁰ Nghaduu iYesu nya ma gbẹẹ, <<Li onyi mbi emi iwyodefa, ama nkye abo wo uga yi ani neni.

²¹ Ongwe Inggise ka lu yeye dafi Afe lo mi ikyen mani. Kpaa ahoo mi ikye inggise ongwu nkye Ongwe Inggise gya mani! Ka tatase gbẹẹ a ki mban ba.>>

²² Ngwi a le gye ungwogye nɛ, iYesu kyelu ibredi, ta Imgbasho angba man kye mwalu, kye nu emi ongwafɔɔn gbɛɛ, <<Gbɛ na; nɛnɛ li ikpewo mgbi ani.>>

²³ O di kyi kyelu ibwɛ, ta Imgbasho angba di kye nu ma, ama duu wa mi efu.

²⁴ O nya ma gbɛɛ, <<Nɛnɛ li eyi mgbi ondu odzɛɛdze mgbi ani, ongwi a kye yawo mi ikye ibyi inggise.

²⁵ Ani le nya ema otsitsi, n ka weni awawa ekwɔ nɛ wuba nghataa mi egbe ngwi n ka wan ofufe mi esuto mgbi Imgbasho mani.>>

²⁶ Ngwi a shashi nɛta, a tase lu Unggwɔ Olivi.

iYesu teyi gbɔ dafi iPyita ka wa tangwɛ ongwu

²⁷ Ta iYesu si nya ma gbɛɛ, <<Ema duu ka tangwɛ ani, bana Afe lo gbɛɛ:

<< <N ka gbɔ inggise ongyo ifyungwɔ ta, mmala ka ganya.>

²⁸ Nghaduu ni ani wa kyato mi ikwu yɔ, n ka teyi ema kaka iGalalia.>>

²⁹ Kpaa iPyita gbɔ mi ododa gbɛɛ, <<Kini inggise duu tangwɛ kpaa, ani ka tangwɛ ba.>>

³⁰ Man iYesu nyan gbɛɛ, <<N nya abu otsitsi, mi otu inɛ neni, duuse ni ogbigbi teela akpe efa yɔ, abu ka tangwɛ ani akpe eta.>>

³¹ Nghaduu iPyita biibe mi ela mfye gbɛɛ, <<Kini li ikwu kpaa ani ka kwulu yi abu, n ka tangwɛ abu ba.>> Angbeka ntona duu kpaa gbɔ ngha.

iYesu mi iGesemani

³² A ke imbe ngwi ali kwun di iGesemani, ta iYesu gbo yi emi ongwafoon gbɛɛ, <<Sise mmene na nin ka bibo.>>

³³ O kyi kyelu iPyita yi iJensi beyi iJon lu yan, man o wita ogyadze mi itukwu kpakpa i di kakan ewo.

³⁴ Ne o nya ma gbɛɛ, <<Elela okyockyo gbɛlu os-hishe mgbi ani duu so nghataa kaka mi odzedze mgbi ikwongye kpaa, ne dze mmene le ngyo na.>>

³⁵ O si kiyayi gwee ta, kwoke ese bibo gbɛɛ no li kyeme-kyeme yo, ni obyi ne nye ongwu.

³⁶ O si gbogbɛɛ, <<Baba, Otsani, alungwo dze kyeme-kyeme mbi abu. Kyi kyelu ibwe adze ne mbi ani. Kpaa no ka li mi owitukwu mgbi ani ba, no li mi owitukwu mgbi abu.>>

³⁷ Ta o yido wa tu engwafoon tole nuna. O si nya iPyita gbɛɛ, <<iSaimon, abu le nunaa? Obyi onyi kpaa abu ka yagba ngyo lo?

³⁸ Ngyo di bibo ikyegbɛɛ ni ema ka gbese mi imbadi ba. Onodzi yo le dze yi oweka, kpaa ewo dzatsi.>>

³⁹ O diye lu ka bo ito ibo ngwi o teyi bo mani.

⁴⁰ Mi ono ngwi o ye mani, o diye tu ma tole nuna, ikyekye akwukwine lo loma. A ye odze ngwi a ka gbo nyan ba.

⁴¹ Ngwi o ye akpe ongwu ta ne, o gbo yi ama gbɛɛ, <<Ema kale nuna dile tonya maa? I gyo ngha! Ono ma gyo wa! Dika, a kye Ongwe Inggise wo emi ibwubwe abo wa.

⁴² Kyato i ke na! Inggise nkye ani gya ma ba wa! >>

A bwa iYesu

⁴³ Ngwi o kale gbɔdze neta, iJuda, onyi mbi iwyodefa ntona, ba wa to. Ibyi inggise to yan, a sha okwusunkli yi itsitsi okwuta, ngwi li engyukwo ama ofife beyi etsetse mgbi ola mgbi iMose yi emyine dɔ ma esɔ.

⁴⁴ Mi itɔnɔ nɛ ongye okyon gya na wewo tso ma ambe duu gbɛɛ: <<Ongwu ani kye ondu kwon ataka ma li ongwu aali; bwan ngyon kyon lu na.>>

⁴⁵ Vla neta iJuda kɛ mbi iYesu, o gbɔgbɛɛ, <<Otsetse!>> Man kye ondu kwon ataka.

⁴⁶ Engyulo ntona si kpakli iYesu di bwan.

⁴⁷ Ta onyi mi idzidze mgbi ama nkwulesɛ to kwekwɛ na kye ngwalu okwusunkli mgban kye kwodze adɔ onyi mgbi ongbidɔ mgbi okwukwo inggise ofife.

⁴⁸ Nɛ iYesu gbɛɛ, <<Ani li inggise ogbe ama oblofe teyi se ngwi ema ba mbi ani yi okwusunkli yi itsitsi okwuta owa bwa anii?

⁴⁹ Alegbe ani li dze yi ema, le tso mi ozu okwukwo osunu Imgbasho mi iJerosalin, kpaa ema bwa ani ba. Nghaduu li kyemɛ ngwi Afe ka mbwumbwo.>>

⁵⁰ Ta ali inggise duu tangwan tsinya dzanta.

⁵¹ Ongwe mmafa oka, kye angwuto ondlendle ngaama, le kyɛdɔ iYesu. Mi onɔ ngwi a bwan mani,

⁵² o tsinya dzata angwuto mgban mi iyikpa, lu ibiba.

A kye iYesu ba mbi ama odi mi ola

⁵³ Nɛ a kye iYesu kɛ mbi okwukwo inggise ofife, beyi engyukwo ama ofife duu, yi engyukwo emi iJuda yi etsetse mgbi ola kwakye mbonyi.

⁵⁴ IPyita si kyan iyikpa mbombo, nghataa ka kaka imbe ogbiikwo mgbi okwukwo inggise ofife. Mmana o sise yi ama ongyoongyo dile wola.

⁵⁵ Engyukwo ama ofife beyi okwakye mgbi ama odi mi ola duu tole pita obwendε mi ikpewo iYesu ikyegbεε nu ma ngwɔn, kpaa a tu onyi ba.

⁵⁶ Bana inggise kwuba gbɔ obwendε atsika mi ikpewon, kpaa elodze mgbi ama kwokyi yi eka ba.

⁵⁷ Ne inggise angbeka di kyato nu obwendε atsika mi ikpewon gbεε:

⁵⁸ <<Eyi fwon le gbɔgbεε, <N ka kye ozu okwukwo osunu Imgbasho mi iJerosalin ngwi inggise mbe mi abɔ ne kye gbobu diyε mbe oka mi egbe eta, ongwi li abɔ mgbi inggise mbe ba mani.>>

⁵⁹ Nghaduukpaa obwendε mgbi ama na kwokyi ba.

⁶⁰ Ta okwukwo inggise ofife kyato mi ine mgbi ama si byi iYesu gbεε, <<Abu ka nu uka lo? Li ali obwendε ngwi inggise ntonε le kye ba ikpewo abu ngha?>>

⁶¹ Kpaa iYesu kwulu ondu nu ma uka ba. Okwukwo inggise ofife na di byun gbεε, <<Abu li iKrestu, Ongwε Imgbasho Ongha yi mse naa?>>

⁶² IYesu si gbεε, <<Li ani ma aani. Ema dika wa di Ongwε Inggise ka sɔ abugye mgbi Ongwu Nghaangha dika kye akpa mi esho.>>

⁶³ Okwukwo inggise ofife na si kye nghalu angwuto mgban. O byita gbεε, <<Kyonε ngwi eyi di mina obwendε angbeka?>>

⁶⁴ <<Ema fwo ito ntonε ma, ema tsεwε sine?>>

Ama duu nu iYesu obube gbεε o gyo ondu ikwongye.

⁶⁵ Ta angbeka wita okyanggwɔ kyin ewo; a kye ungwɔ bwan inɛ, kwon asa, di nyan gbɛɛ, <<Di yegbo ka!>> Ta inggise ama ongyoongyo na byin di gbon ibe.

IPyita tangwɛ iYesu

⁶⁶ Mi onɔ ngwi iPyita ka dze ese mi ifyudɛ nɛta, ongwongyaa onyi mi idzidze engbido mgbi okwukwo inggise ofife nani, ba wa kaka.

⁶⁷ Ngwi o di iPyita le wola nɛta, o din inɛ si gblekɛ kwɛkwɛ yan.

O nyan gbɛɛ, <<Abu kpaa li kye yi iYesu ongwɛ iNadzareti.>>

⁶⁸ Nghaduu iPyita tangwɛ gbɛɛ, <<Ani yon hona difwi odze ngwi abu le gbo nɛ kpaa ba,>> man o tase mi onufe okakaakaka.

⁶⁹ Ngwi ongwongyiido na din mmana nɛ, o di nya ama nkwudze to ma gbɛɛ, <<Inggise nɛ kpaa li onyi mboma.>>

⁷⁰ IPyita di tangwɛ.

I wa dze gwee nɛta, ama nkwudze to kwɛkwɛ na nya iPyita gbɛɛ, <<Li otsitsi abu li onyi mi idzidze ma, bana abu li emi iGalalia.>>

⁷¹ Ta iPyita wita owo ewon ikamba di fa yi ama gbɛɛ, <<Ani ye inggise ngwu ema le gbɔdze kwu iyin nɛ ba.>>

⁷² Mina nɛta ogbigbi teela akpe efa. Ta iPyita wɛ elodze ongwɛ iYesu gbo yan gbɛɛ: <<Ogbigbi ka teela akpe efa waba ta, abu ka tangwɛ ani akpe eta mani.>> Man o si nye yi ikwu otseetse.

15

A kye iYesu ba inai iPlatu

¹ Mi egbegbe ototu neta, engyukwo ama ofife yi engyukwo mgbi emi iJuda beyi etsetse mgbi ola yi okwakye mgbi ama ogbiikwo gbela yi ewoma. A si bwalu iYesu kyon wa nu iPlatu (ongwu nli iGona mgbi emi iRoma nani).

² IPlatu si byi iYesu gbɛɛ, <<Abu li uto mgbi emi iJudaa?>>

Ne iYesu nun uka gbɛɛ, <<Eɛn, dafi abu gbo mani.>>

³ Engyukwo ama ofife du ongwufabo mbon mi itodze kwuba.

⁴ Ne iPlatu diye byun gbɛɛ, <<Abu ka nu ani uka lo? Di umbwo ungwɔ ngwi a le du ongwufabo mbi abu ikye ma neni.>>

⁵ Nghaduu iYesu di nun uka ba kpoo, ta i si kwulu iPlatu ewo.

⁶ Alono oga owe owato-wato mgbi emi Israi yo, iPlatu li dulu inggise onyi mi obawi, ongwu emi iJuda mina mani.

⁷ Ongyulo oka ngwu a li kwun di iBaraba wodze obawi. A bwalun yi inggise angbeka ka woke obawi ikyegbɛɛ a ngwo inggise ono ngwi a le kyo ablodze.

⁸ Ibyi inggise wulu ba mbi iPlatu wa nyan gbɛɛ no kyo yi ama ungwɔ ngwi o li tsekise kyo mani.

⁹ Man iPlatu byita gbɛɛ, <<Ema mina gbɛɛ ni ani dzata uto mgbi emi iJuda nu emaa?>>

¹⁰ Ikyesine o ye dafi li uwaba ngwi engyukwo ama ofife kye iYesu wa nun mani.

¹¹ Kpaa engyukwo ama ofife si fyi ibyi inggise ntona mfye itukwu gbɛɛ nu ma nu iPlatu dzita iBaraba no ka li iYesu ba.

12 IPlatu byi ma gbɛɛ, <<Li ekyɛ nin kyɔ yi ongwu ema kwun di uto mgbi emi iJuda nɛ?>>

13 A wulu gbɛɛ, <<Ngwɔn mi ekwatsi!>>

14 IPlatu byita gbɛɛ, <<Li alungwɔ obube ngwi o kyɔ?>>

Kpaa a nghao gbɔ mi ela okwukwo gbɛɛ, <<Ngwɔn mi ekwatsi!>>

15 Ngwi o mina okyɔ itukwu mgbi ibyi nɛ, iPlatu si dzata iBaraba nu ma. O nu ma gbo iYesu onitse ibyibyi si kyon nu ma oka ngwɔ mi ekwatsi.

Ama oblakwutɛ nya iYesu agya.

16 Ama oblakwutɛ si kye iYesu lu udɛ iGɔna, mi imbe o li sɔ gbiikwɔ si kwu ewoma ela tsatsa kwakye.

17 A kye angwuto omuma shinishini won, di kyi shili akata ato kye tukwun ikye.

18 Ta a wita onyan agya gbɛɛ, <<Eyi ta abu angba uto mgbi emi iJuda!>>

19 A diyɛ kye okwuta le gbon mi ikye di kyanggwɔ kyin. Man a gbe akwafɔ kwesɛ diyɛ sunun.

20 Ngwi a nyan agya nɛ, a dulun angwuto omuma shinishini na kye mgban won. Ta a kyon tase oka ngwɔ mi ekwatsi.

A gbokwo iYesu mi ekwatsi

21 Ongyulo oka mi igeli iSirini, ngwu a li kwun di iSaimon, otsɔ Alekidzanda beyi iRufu, yɛ kye ɛsɛ mgban nye le lu. A siin gbɛɛ non kye ekwatsi nani.

22 Nɛ a kye iYesu ba imbe ngwi a li kwun di iGogota nani (ngwi itan di Imbe Ikpalikye).

²³ Ta a kye eneekwo takye yi otse oyulu ungwɔ owulewo nun gbɛɛ no wa, kpaa o fwa owaawa.

²⁴ Man a kyon gbokwo mi ekwatsi. A gbelun angwuto kye ghalu, a gbeefa ikye odi ungwɔ ngwi ali inggise ka tu mani.

²⁵ Li obyi ongwu gyanɛ mi egbegbe ngwi a kyon gbokwo ekwatsi.

²⁶ A lo ungwɔ ama ngwi a du ongwufabo mbon mi ele ma gbɛɛ: UTɔ MGBI EMI IJUDA.

²⁷ A gbokwo ama ofoofɛ nghi efa biyan, onyi mi abugye mgban yi oka mi abubɛ.

²⁸ (Nɛ Afɛ mbwumbwo odze ngbɛɛ, <<A gbɔn wo umbwo yi ama ofoola.>>)*

²⁹ Ama nle nyɛ ofɛ gbe ito tukwun kpakpa, le ngwi ikye dile gbɛɛ, <<Oho! Abu ngbɛɛ o ka gbobu ozu okwukwo osunu Imgbasho mi iJerosalin diyɛ kyi mbɛlu mi egbe eta nɛ,

³⁰ tashulu mi ekwatsi ba esɛ di dulu ewabu tɔ ka!>>

³¹ Li ngha ngwi engyukwo ama ofifɛ beyi etsetse mgbi ola kpaa le nyan agya yi ewoma gbɛɛ, <<O li dulu angbeka tɔ, kpaa o yagba dulu ewon tɔ wuba!

³² Ni iKrestu, uto mgbi emi Israi nɛ, tashulu onɛnɛ mi ekwatsi ba esɛ, ni eyi di diyɛ noyɛyɛ.>> Ama ngwu a kye ma gbokwo ekwatsi biyan kpaa fan esɛ.

³³ Mi onɔ idzidze ude yɛyɛ nɛta esɛ duu yifu nghataa ba obyi eta mi onɔde.

³⁴ Mi obyi ongwu ta mi onɔde na, iYesu si makwo mi ela okwukwo gbɛɛ, <<Eli, Eli, lama

* 15:28 15:28 Ambulu nɛ dze mi olɔɔlɔ angbeka ba.

sabatani?>> Ngwi itan gbɛɛ, <<Imgbasho mgbi ani, Imgbasho mgbi ani, li ekye ngwi abu le dzanita?>>

³⁵ Ngwi ama nkwulɛɛ to kwɛkwɛ fwo ungwɔnɛ nɛ, a gbɔgbɛɛ, <<Gado na, o le kwu Elaija ela.>>

³⁶ Ongyulo onyi mboma tsinya kɛ, kye isoso woke enee kwɔ onunɔ, kye fake ekwɔ si kyilen kye nu iYesu gbɛɛ no wa. Man o gbɔgbɛɛ, <<Dzanta na. Ni eyi di kyayina Elaija ka wa tashulun ba esɛ.>>

³⁷ IYesu gbobakwɔ mi ela okwukwo man o si yulu.

³⁸ Ta angwuto ngwi a kye tsɛ mi idzidzɛ ozu okwukwo osunu Imgbasho mi iJerosalin na gbua efa mi esho nghataa luba esɛ.

³⁹ Ngwi agyegika mgbi ama oblakwutɛ, ongwu nkwulɛɛ mmana mi inai iYesu, fwo akwɔ mgban yɛ di dafi o kwulu nɛ, o gbɔgbɛɛ, <<Otsitsi inggisɛ nɛ li Ongwɛ Imgbasho!>>

⁴⁰ Engyaa angbeka kwulɛɛ mbombo le di ungwɔ nle kiyayi mani. Mi idzidzɛ ma li iMeri iMagidalin bɛyi iMeri onɔ iJensi ongbungbɛ bɛyi iJosisi yi iSalomi.

⁴¹ Mi iGalalia engyaa ntonɛ nose li kye yi iYesu dile yan abɔ kpaa. Engyaa angbeka kwuba nba biyan mi iJerosalin kpaa to imbe nani.

Ondziindzi mgbi iYesu

⁴² Li egbe owewo (obwi egbe otonyewo). Ngwi onɔ le gbɛɛ nɛ,

⁴³ iJose ongwɔ Arimatia, inggisɛ okpongɔ mi idzidzɛ okwakye mgbi ama ogbiikwɔ, ongwu abuan le fɛ obaaba mgbi esuto mgbi Imgbasho. O kɛ yi imio ba mbi iPlatu ka bɔn ikwɔ mgbi iYesu.

⁴⁴ Nε i kwulu iPlatu ewo ofwo gbεε iYesu kwulu wa. O kwu ongyukwo mgbi ama oblakwutse na ela, o byun ita ni iYesu kwulu wa yɔ.

⁴⁵ Ngwi o wa fwo mi ondu ongyukwo mgbi ama oblakwutse gbεε dze ngha nε, o kye ikwɔ na nu iJose.

⁴⁶ Ta iJose gya angwuto ondlendle, o kye sulu ikwɔ mgbi iYesu kye ndiwoke angwuto na man kyon ndzi mi endzi ngwi a cεfo ikwutse. Ta o tsamu ofishi tukwu ondendzi.

⁴⁷ Nε iMeri iMagidalin beyi iMeri onɔ iJosisi di imbe ngwi a kyon ndzi mani.

16

Okyεε-kyεε mi ikwu

¹ Ngwi egbe otonyido wa nye nε, iMeri iMagidalin beyi iMeri onɔ ijensi yi iSalomi gya engyie ogbungbe ikyegbεε ni ama ka kye gyuwɔ ikwɔ mgbi iYesu.

² Mi egbegbe byibyiibi mi egbe ongwɔ ababo mi ikyidu (egbe iladi) ngwi onɔ le tɔ neni. A si tɔ ofe le lu endzi,

³ a byi eka ita mi ofe gbεε, <<Li emε ka mulu eyi ofishi mi ondendzi nε?>>

⁴ Kpaa ngwi a kyile ikye esho nε, a di gbεε ofishi ngwi a kye tukwu ondendzi ma mulu.

⁵ Ngwi a kaka endzi nε, a di ongwongyulo mmafa wo angwuto onzundze sɔdze agya abugye mi endzi, ta i kwulu ma ewo.

⁶ Ongyulo na nya ma gbεε, <<Ka tsimio ba na. Ema le pita iYesu ongwɔ iNadzareti, ongwu a ngwɔn mi ekwatsi nani. O kyato mi ikwu! O dze mmene wuba. Di imbe ngwi a kyon la ma na.

⁷ Nghanɛ ema yɛ lu na ka nya engwafɔ mgban yi iPyita gbɛɛ, <O teyi ema le lu iGalalia ma. Ema ka din mi imbe na, dafi o tsekise nya ema mani.>
>>

⁸ Engyaa ntona si tase mi endzi tsinya. Ewo shi igakwu loma i di wo ma endɛ. A gbɔdzɛ yi inggise onyi kpaa wuba, ikyena imio wo ma.

⁹ [Ngwi iYesu kyato mi egbe iladi mi egbegbe nɛ, o kye ewon tso mbi iMeri iMagidalin ababo, ongwu o lɔ onodzi ibwubwe tɔ mbon nghi egyafa nani.

¹⁰ O si lu ka nya ama nkyɛ yan tole tsukwu dile makwɔ mani.

¹¹ Ngwi a fwo gbɛɛ iYesu dze oshishe, ongyaa na din nɛ kpaa, a noyɛyɛ mi ele ba.

¹² Onɔ wa nyɛ nɛ, iYesu di kye ewon tso emi ongwafɔɔn angbeka nghi efa mi ofɛ oka idzidza onɔ ngwi a le kyikyɛ mi esɛ na mani.

¹³ A si yɛ wa nya angbeka ntona; kpaa a nu ma oyɛyɛ ba.

¹⁴ Onɔ gwee nɛ, iYesu di mblegba to iwyodonyi ntona ngwi a le gye ungwogyɛ; o shɔdzɛ yi ama mi oyɛyɛ onuunu ba beyi ikyegbɛɛ a fwa kye itukwu tiishu onoyɛyɛ mbi ama ndin onɔ ngwi o kyato mi ikwongye mani.

¹⁵ Man o nya ma gbɛɛ, <<Lu esɛ ka gbɔ Esɔ Osuse nɛ nya ali inggise duu.

¹⁶ Ali inggise nnoyɛyɛ ngwi a di kyɔn iBatisima yɔ, o ka watɔ, nghaduu inggise nnoyɛyɛ bayɔ, o ka dzili.

¹⁷ Ambɛ ntonɛ dika kyɛdɔ ama nnoyɛyɛ: Mi iyi mgbi ani a ka lɔ onodzi ibwubwe tase; a dika gbɔ ondudze ofufɛ;

¹⁸ a ka kye abo byi ifa; ni a wa otse ikwongye kpaa unkonyi ka kyo ma ba du; a dika kye abo gbo ama ndotse ta ootse ka ngye loma.>>

¹⁹ Ngwi Otse iYesu gbodze ne yi ama ngye neta, Imgbasho kyon lu esho, o sika soko abugye mgbi Imgbasho. ²⁰ Ne emi ongwafoon si tase ka gbeeso mi ali imbe duu, ta Otse Imgbasho kyido yi ama dile mbwumbwo mi elodze mgban yi ambe nkyedo mani.]*

* **16:20 16:20** Ambulu ngwi wita mi egyane lu osu dze mi ololo tugbe mgbi ondu iGrikii ngwi a di nghao kye ma wuuta ma ba.

Etulo NT

Portions of the Holy Bible in the Etulo language of Nigeria

copyright © 2024 Initiative for the Translation and Development of African Languages

Language: (Etulo)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025

156b6685-3a62-5375-95ed-97245882cc90